


60



- 23

G. I. 29.

PRAXIS  
FRUCTUOSE  
MEDITANDI

RELIGIOSIS POTISSIMUM  
TYRONIBUS ACCOM-  
MODATA.

EX

Diversis collecta Ascetis.



---

WRATISLAVIÆ,  
Typis Acad. Colleg. Societat. JESU. 1728.





## PARÆNESIS

Ad Tyrones Societatis JESU.

**H**omines mundo crucifixos, & quibus mundus ipse sit crucifixus, vitæ nostræ ratio nos esse postulat: homines, inquam, novos, qui suis se affectibus exuerint, ut Christum induerent; sibi mortuos, ut justitiæ viverent: qui, ut Divus Paulus, in laboribus, in vigiliis, in jejuniis, in castitate, in scientia, in longanimitate, in suavitate, in Spiritu Sancto, in charitate non ficta, in verbo veritatis se DEI ministros exhibeant: & per arma justitiæ à dexteris, & à sinistris per gloriam, & ignobilitatem; per infamiam, & bonam famam; per prospera denique, & adversa magnis itineribus ad Cœlestem Patriam & ipsi contendant, & alios etiam quacunque possunt ope, studioque compellant, maximam DEI gloriam semper intuentes. Hæc est summa, hic scopus Instituti, ad quem assequendum efficax, & necessarium valde medium est Oratio Mentalis, ad quam cum fructu quotidie instituendam, serviet hæc Praxis clara, ac facilis meditandi Religiosis Tyronibus accommodata, qui recte secundum finem vocationis suæ scient vivere, si recte noverint orare.



# CAPUT PRIMUM.

## *De natura , scopo , & fructu Meditationis.*

I.

**M**editatio, prout ab Ascetis sumitur, est religiosa mentis actio, per quam ex discussione alicujus veritatis fidei per memoriam propositæ; intellectus conclusionem practicam ad spiritualem animæ fructum accommodatam deducit; Voluntas autem affectus pios, ac salutare, nec non efficacia reformandæ vitæ, & morum proposita, in determinatis circumstantiis, & occasionibus executioni mandanda statuit, & decernit; quam Meditationem S. Ignatius exercitium trium potentiarum nominat, eò quòd per illas sinè motu linguæ, & labiorum, aut externa prolatione verborum meditatio peragatur.

2. Scopus & finis adæquatus meditatio-

A 2

tio-

tionis est, scire, velle, & facere, quidquid  
 religiosæ vocationis ratio, & officium  
 ad vitam perfectè traducendam requirit;  
 juxta illud Augustini: Rectè novit vive-  
 re, qui rectè novit orare. *Scire* importat  
 illustrationes intellectûs; *velle*, motus, &  
 proposita voluntatis; *facere*, actiones po-  
 tentiarum externarum, voluntatis impe-  
 rio subjectarum, ad exequenda proposita  
 ordinatarum. Hujusmodi potentia ex-  
 ecutrices sunt septem: Visus, auditus, odo-  
 ratus, gustus, tactus; itè potentia lo-  
 cutiva, & loco motiva. His adnumerari  
 possunt imaginativa potentia, & appeti-  
 tus sensitivus, tam concupiscibilis, quàm  
 irascibilis, quatenus voluntatis directio-  
 nem admittunt.

3. In fine adæquato Meditationis tres  
 continentur fructus, qui velat totidem  
 scopi partiales invicem subordinati spe-  
 ctantur, & intenduntur à meditante.  
 Quorum *primus* est debita illustratio in-  
 tellectûs; *secundus* efficax impulsio, & pro-  
 positum voluntatis; *tertius* constans pro-  
 positi executio per externas potentias in  
 praxim redigenda. Ex quibus duorum  
 priorum fructuum assecutio immediatè  
 spectari, curarique debet in actuali medi-  
 tatione; tertius autem in occurrente rei  
 propositæ circumstantia, & occasione.

Quia,



Quia varò secundus fructus est multò dignior, excellentiorque primò; hinc plùs longè in actuali meditatione insistendum est efficacibus voluntatis impulsibus, affectuumque exercitio, quàm prolaxis intellectùs discursibus, aut profundis conceptibus: nam primus fructus ad secundum, habet se velut medium ad finem.

4. Totus porrò affectuum fructus, consistit in eliciendis solidis, ac efficacibus propositis super practicas fidei veritates bene discussas fundatis, & ad alicujus in particulari virtutis exercitium, aut viti fugam directis. Quocirca cavendum, nè solis duntaxat infructuosis, atque in vanum elicitis insistas affectibus: si enim absque ullo reformandæ vitæ proposito orationi tuæ finem imponeres, similis illi foret, qui ad lautum invitatus convivium satis haberet cibos videre, ac in bono dapum ordine, earumq; splendore sibi complacere, absque eo, quòd quidquam indè degustaret.

5. Hæc bona Preposita nihil sunt aliud, quàm firma animi decreta, & resolutiones practicæ, quibus meditans fertur ad efficaciter amplexandum aliquod in particulari bonum cognitum, aut è contrà malum fugiendum. Quorum bonitati nihil officit, etiamsi in eliciendis illis nulla

sensibilis svavitas , & devotionis gustus animum tuum titillaverit ; imò etiamsi suggestionem aliquam , aut tentationem virtuti illi contrariam , sed involuntariam , & quam continuò represseris , expertus fueris. Vidimus nonnullos , qui cùm per totam orationis horam multiplici mentis evagatione , & voluntatis ariditate fuissent infestati , demum efficacissima sub finem conceperunt animi proposita , quæ etiam fideliter sunt executi , uberiorémque exinde retulerunt fructum , quàm ii , qui totius orationis decursu , magna animi pace , ac malaciâ fuère perfruiti.

6. Ut proposita sint fructuosa , has condiciones quatuor habere debent. *Pri-*ma est : ut sint particularia , id est ad certas circumstantias , & occasiones directæ : promittere enim in communi velle se humiliare , nihil promittere est. *Secunda* est : ut tam meditationis scopo sint conformia , quàm meditantis statui convenientia ; hinc discretè , non autem juxta repertinum impetum cujusdam affectûs sensibilis minùs ordinati debent elici. *Tertia* est : ut adjunctam aliquam industriam habeant , quæ consistit vel in remotione impedimenti , quod executioni obstare posset , vel in delectu alicujus positivi medi , cujus ope executio reddatur facilior.

Quar-





*Quarta* est: ut fiant cum certa quadam libertate animi, promptitudine, ac fiducia in DEum, quòd, qui dedit gratiam illa statuendi, dabit quoque gratiam statuta explendi.

7. Inter meditationum proposita, & eorum executiones magna intercedit differentia: certum namque est opera desiderii esse multò difficiliora: quia in opere ipsum objectum reipsa præsens est, in desiderio aurem reipsa est absens; & in imaginatione duntaxat est præsens. Unde etiam usuvenit, ut sæpe in meditatione simus ferventissimi, & quævis nos obstacula superaturos statuamus, dum interea præsente occasione ad opus descendendum est, procul nos ab eo, quòd proposuimus, abesse deprehendimus. Proinde non satis est hæc in animo desideria, ac proposita sentire; sed danda insuper opera, ut illa occurrentibus etiam circumstantiis, & occasionibus, evadant efficacia, & executioni mandentur.

8. Ad quod juvabit scire meditationum proposita esse quasi semina, atque ad hoc, ut suo loco, tempore, & occasionibus speratum adferant fructum executionis, duo requiri. *Primum* est: Cælestis gratiæ à Deo implorandæ subsidium: omnis enim sufficientia nostra ex DEO est.

*Secundum* : virtutis motivæ pro circumstantia, & occasione in memoriam recurrentis influxus : eadem enim vis motiva, quæ tempore meditationis inclinavit voluntatem ad efficaciter velle, inclinabit quoque executrices potentias, occurrente executionis occasione, ad facere; si illa per jaculatoriam aliquam aspirationem suo loco, tempore, & circumstantiâ in mentem reducta fuerit.

9. Ex his collige meditationem non esse finem hominis religiosi, sed medium duntaxat, & instrumentum ad subjugandas animi passiones, extirpandos vitiorum habitus, & debitos virtutum actus juxta Instituti rationem exercendos. Gravis proinde error foret, ac illusio, si quis in meditatione, tanquam termino conquiesceret, ejusque solatiis, ac dulcedine pasci veller, atque juxta horum mensuram suæ meditationis fructum, bonitatem, & successum metiretur: hoc enim esset scopum, & ordinem meditationis invertere, & medium pro fine constituere.

## CAPUT II.

### *De præparatione ad Meditationem requisita.*

10. **D**uplex est præparatio ad meditationem necessaria, una remota, altera

altera proxima. Remota in sequentibus ferè capitibus consistit. *Primò*: Ex perlectis meditationis punctis eliges dictum, aut factum Christi tale, cujus discussionem ibidem adjunctam probè intelligis, tibi que pro eliciendo exinde fructu spiritali magis accommodatum advertis. *Secundò*: Deduces indè conclusionem practicam ad mores pro necessitate præsentis directam, id est: doctrinam aliquam spirituales pro scopo meditationis tuæ statuendam. *Tertiò*: nonnulla deliges motiva ad eandem doctrinam ulteriùs firmandam idonea, si ea videris necessaria. *Quartò*: designabis præcipuos affectus in quavis meditationis parte excitandos. Quæ omnia summatim, & breviter constituenta sunt, ut suus de his discurrendi campus uberius intellectui pro meditationis hora reservetur.

II. Aliqui ex singulis punctis præscriptæ meditationis singulas eruunt doctrinas, quarum unam post alteram, per horam meditationis expendunt, sibi que applicant. Alii unâ duntaxat doctrinâ contenti, eam per totum horæ decursum ruminant, & discutiunt, eò ferè modò, qui capite sequenti explicabitur; & hic modus videtur alteri præferendus; tum quia intellectus plus moræ, & temporis habet ad



doctrinam meliùs expendendam, motivis-  
que firmandam ; tum quia voluntas effi-  
caciùs impelli potest ad eam amplecten-  
dam , & inquirenda media , quibus ejus-  
modi doctrina ad praxim sua occasione, &  
circumstantiis possit redigi.

12. Proxima præparatio consistit *primò*. in consideratione Christi Domini , ut  
præsentis, cui reverentia cum humili ge-  
stu exhiberi debet. *Secundò* in oratione  
præparatoria, quâ petitur à DEO gratia  
rectè, id est attentè, devotè, ac fructuo-  
sè meditandi ; virésque, ac operationes  
omnes ad majorem DEI gloriam, & oran-  
tis animæ salutem, atque perfectionem  
diriguntur. *Tertiò* in præludiis aliquando  
duobus , ut contingit in via purgativa ;  
aliquando in tribus, ut fit in via illumina-  
tiva , & unitiva , ubi de vita , & gestis  
Christi instituuntur meditationes.

13. Oratio præparatoria esse potest, vel  
in omnibus meditationibus eadem, præ-  
sertim apud incipientes; vel secundùm va-  
rias animi dispositiones, jam restringi, jam  
ampliari ; nè si eòdem semper modò fiat,  
generet fastidium. Orationis præparato-  
riæ exemplum habes : O DEUS infinitæ  
Majestatis, ecce ego conspectu tuo indi-  
gnissimus , ad pedes misericordiæ tuæ,  
tâ, quâ possum reverentiâ, & demissione

ani-

animi prostratus adoro te, ac veneror. Respice, quæso, in faciem Christi tui, meorumque veniam peccatorum clementer indulge, quæ contrito corde super omnia retracto, ac detestor. Suscipe in odorem suavitatis hoc orationis holocaustum, quod ad maiorem gloriam tuam, meæque animæ salutem, ac perfectionem instituo; atque ideo ex nunc omnibus distractionibus, quæ mihi evenire possent, renuntio plenè, coram te protestans, nulum illis præbere me velle consensum. Reple igitur memoriam meam cogitationibus sanctis, intellectum cælesti lumine illustra, & voluntatem meam amoris tui igne inflamma: ut hinc recedam totus in alium mutatus, atque omnino ad tibi ampliùs, quàm hactenus fecerim, serviendum resolutus. Hæc omnia non solum pro me, sed etiam pro omnibus mecum oraturis simpliciter peto, per merita JESU Christi, Beatissimæ Virginis Mariæ, & omnium Sanctorum.

14. In meditationibus de vita Christi in præludio *primo* res meditanda per historicam rei gestæ repræsentationem; in *secundo* per imaginariam loci compositionem, quodammodo ante oculos ponitur: ut animus tantò faciliùs in ejus consideratione à distractionibus immunis conser-

vari possit. Quòd si res meditanda fuerit incorporea , tunc alterius rei cuiuspiam, quæ præsentì materiæ conveniat, serviâtque , imaginatio substituenda est ; in qua tamen formanda , vis capiti inferenda non est , neque moræ trahendæ. In præ'udio *tertio* petitur à Deo gratia præsens mystèrium , ut par est , expendendi , piósque ac sanctos affectus excitandi ; quæ omnia ultra spatium unius , vel alterius miserere extendi non debent.

15. His rite peractis ad ipsam delecti ad meditandum puncti discussionem transibis , in cujus principio te monitum volo , ut applicatio intellectûs sit moderata , id est : nec nimium intenta , neque nimium remissa , nec nimium præcipitata , neque nimium lenta. Verùm oportet , ut sit sedata , non tamen sinè vigore ; tranquilla , non tamen sinè vivacitate. Ex non debita hujus doctrinæ observatione multi parùm proficiunt ex oratione : nonnulli enim statim à principio illius materiam sibi propositam , tanta cum capitis , pectorisque contentione , ac impetu considerare incipiunt , ut defatigatâ naturâ , atque viribus exhaustis desistere cogantur. Alii è contrâ vel totam orationis horam magno cum animi langvore peragunt ; vel in principio non nihil laborant , móxque lassati



fati in quasvis obvias feruntur cogitationes, quas illis phantasia suggerit, nullam inferendo vim continendæ in suo officio imaginationi, aut intellectui.

16. Nonnulli curiosos sectantur conceptus, & sublimes affectant discursus, qui aliud non agunt, quàm quod ingenii sui curiositati satisfaciant, séque à spiritu DEI, qui simplex est, procul elongent; nec quidquam in vitæ suæ emendatione proficiant. Certum proinde habe, eò te DEO gratiorem futurum, quò simplicius cum eo conversatus fueris: nam *cum simplicibus sermocinatio ejus Prov. 3.* Hinc considerationes intellectûs debent esse *primò* communes, ac familiares: non verò affectatæ, & sublimes. *Secundò*: simplices & devotæ, non verò subtiles & curiosæ. *Tertiò*: convenientes, hoc est: non tantùm scopo meditationis congruentes; sed etiam statui meditantis conformes.

17. Quia verò juxta doctrinam numero *tertio* datam potissimus meditationis fructus, quem illa immediatè intendit, voluntatem potius respicit, quàm intellectum: ideò plus tribue temporis ferventium affectuum exercitio, quàm discursibus: affectus enim voluntatis plus apud DEUM meriti, apud animum verò tuum plus utilitatis, & necessitatis habent,

quàm actus quantumcumque sublimes intellectus. Non est inquirendum, ait Gerson, in quo consistat virtus, præcisè ut sciamus, verùm ut amemus illam, & in praxim redigamus, atque ità virtuosi re ipsa evadamus. Discursus itaque dirigendi sunt ad affectus, affectus autem ad operationes, in quibus juxta dicta numero *secundo* adæquatus consistit fructus, & finis meditationis.

### CAPUT III.

#### *De modo procedendi in discussione Punctorum.*

18. **I**Nter varios assumptam fidei veritatem discutiendi modos; is non immeritò cæteris sicut facilior, ità quoque utilior videtur, præsertim incipientibus, qui per septem quæstiones sequentes instituitur. *Primò* quære ex te ipso: quod est assumptum punctum meditationis tuæ præsentis? *Secundò*: quid de hoc puncto est considerandum? *Tertiò*: quid doctrinæ pro spirituali fructu indè concludendum? *Quartò* quænam ulterius impellant motiva ad amplectendam ejusmodi doctrinam? *Quintò*: An, & quantum ejusmodi doctri-

næ observans fueris? *Sexto*: quid in futurum sit particulariter proponendum? *Septimo*: quid industriæ ad efficacem propositi executionem sit adhibendum?

19. Hic discutiendi modus paulò fusiùs est exponendus, practicòque exemplò declarandus: longa quippe via est per præcepta, brevis per exempla. Sit itaque pro exemplari meditationis idæa, & fundamento hæc fidei veritas: *Vocatum est nomen ejus JESUS. Luc. 2.* Quam pro die quarta Januarii in tria digestam puncta habes in usu Avanciniano, cum totidem diversis doctrinis moralibus indè deductis; ex quibus tu secundum pro nunc punctum elige, ex cujus discussione, ac doctrina ibidem reperta hunc meditationi tuæ scopum præfice: Socii Jesu titulo, & nomini, mortificationem corporis sociabo.

20. Præmissa oratione præparatoria, cujus paradigma habes numero 13. pro præludio primo, & secundo repræsentati tibi circumcisionem Christi cum impositione nominis Jesu in stabulo Bethlemitico peractam. In tertio gratiam implora præsens mysterium dignè cognoscendi, fructumque indè spirituales consequendi hoc vel simili modo. O divinissime infans, qui gloriosum Jesu nomen in cruenta tui corporis circumcisione suscepisti;

notum



notum fac mihi obsecro , quod ex hoc admirabili mysterio in tui sequelam, ac imitationem à me faciendum requiris ? idque per gratiam tuam da non solum scire , sed etiam velle , & perficere.

21. Quære jam *primò* ex te : quod est assumptum punctum meditationis tuæ præsentis ? & statim per exercitium memoriæ hanc fidei veritatem : *Vocatum est nomen ejus JESUS Luc. 2.* cum accessoriis rei gestæ adjunctis tibi revoca. Affectumque fidei hoc vel simili modo elice: **O** vili mortalitatis nostræ indumento velate **DEus** ! adoro supremam tuam in infantili licet corpusculo Majestatem , credoque firmiter , ac confiteor, te post consummatos à nativitate dies octo salutiferum nomen **JESU** , in quo nos peccatores salvos fieri oportet, suscepisse. Ità me sacra tua docent oracula , quibus firma fide adhæreo , tuæ authoritati hæc revelanti mentem plenè subjicio ; nec enim infinita tua Bonitas me fallere potest , sicut infinita tua Sapientia falli non potest. Fac , ô dulcissime **JESU** , ut nunquam ob peccata mea, aut verbis tuis fidei bona voluntas, aut bonæ voluntati fructus bonorum operum in me desint.

22. Quære *Secundò* ex te : quid de hac veritate sit tibi expendendum ? & mox per

EXER-

exercitium memoriæ reflecte te ad ea,  
 quæ circa hanc veritatem expensa, discus-  
 sâque habes in ulu Avanciniano, quæ tu  
 quoque per exercitium intellectûs discus-  
 te, ac rulina, convenientemque discus-  
 sioni affectum subjunge, unum vel plures,  
 hoc, aut simili modo: Expende anima  
 mea, & vide, quando salutiferum hoc no-  
 men JESU, Divino infanti fuit inditum,  
 nunquid tunc, dum tenellum corpus lapi-  
 deo circumcisionis cultro subjecit? tunc,  
 dum accepti vulneris acerbitatem, cum  
 intimo doloris sensu perpeffus est? tunc,  
 dum immaculatam carnem usque ad pro-  
 fusionem sanguinis incidi sustinuit? infan-  
 tes alii cultrum non prius sentiunt, quàm  
 cuti admoveatur, eamque penetret; Chri-  
 stus verò jam tum in materno utero, ubi  
 perfectissimum rationis usum habuit, do-  
 loris acerbitatem, & saxci cultri scissu-  
 ram novit, præsensitque; neque tamen  
 tenellam carnem vulnere subtraxit, sed in-  
 fracto illud, & lætò animò excepit. Si-  
 milem quidem aliis infantibus emisit vo-  
 cem plorans; at cum gaudio sanguinem  
 matutini Sacrificiî mundo effudit, para-  
 tus omnem in vespertino crucis Sacrificio  
 pro nobis impendere. Tunc igitur, dum  
 hæc gesta sunt, ei nomen JESU, quod est  
 super omne nomen est impositum. O sa-  
 luti-

lutifero JESU nomine insignite pugio, ex-  
 osculor humillimè sanctos illos pannicu-  
 los , quos defluus tuus sanguis irrigavit ,  
 apprimo illos tenerrimè cordi meo , pre-  
 còrque suppliciter , ut cruenta tua linteo-  
 la mihi animos , & robur addant , ad cir-  
 cumcidendas carnis meæ concupiscenti-  
 as , quæ regnant in membris meis.

23. Quære *Tertiò* ex te : quid doctrinæ,  
 seu fructûs spiritualis indè tibi conclu-  
 dendum ? & confestim insinuatam in usu  
 Avanciniano doctrinam , per illationem  
 tibi applica , eique congruum subde affe-  
 ctum , unum vel plures , juxta illatæ do-  
 ctrinæ exigentiam , hoc , aut simili modo :  
 Quid ad hæc tu JESU Socie ? si ab incarna-  
 to DEI Filio , non obtinetur JESU nomen ,  
 & titulus , sinè cruenta impollutæ carnis  
 suæ concisione ; num tu vilissime homun-  
 cio Socii JESU nomen , & titulum gerere  
 præsumes sinè austerâ corporis tui affli-  
 ctatione ? poterat ille , cùm DEUS esset , om-  
 nia corpori suo commoda citra periculum  
 indulgere ; non egebat hòc mediò ad cor-  
 rigendam naturam , quæ nec vitiata erat ,  
 nec vitiari poterat ; non ad subjiciendum  
 corpus rationi , quod Divinitas modera-  
 batur , ità ut non posset rebellare ; & ta-  
 men nominis JESU Successioni , ac titulo ,  
 tam doloriferam suæ carnis sociavit cir-  
 cum-



cumcisionem. Quantò igitur tibi ampli-  
 us JESU Socie ad dignè ferendum voca-  
 tionis tuæ nomen, & titulum, inordina-  
 ti carnis appetitus coërcendi sunt: vitia-  
 ta quippe tibi est natura, & in malum  
 proclivis, caro rebellat spiritui, & in pec-  
 cata inducit; corpus ergo per spiritua-  
 lem mortificationis petram circumciden-  
 dum est, ut debitam tanti nominis mem-  
 suram adimpleas. Ecce paratum corpus  
 meum Domine, paratum est; circumci-  
 de, obsecro, omnia membra, & sēsus meos,  
 spirituali petra, quæ tu ipse es, & quid-  
 quid in me repereris carnale, & super-  
 fluum, rescinde, ac extirpa, carnemque  
 meam disciplinæ tuæ rigore coërce.

24. Quære *Quartò* ex te: quenam ulte-  
 riùs impellant motiva ad amplectendam  
 ejusmodi doctrinam? & illico reduc in me-  
 moriam ea motiva, quæ præparationis  
 tempore è communibus Sacræ Rhetori-  
 cæ locis, seu motivorum fontibus Cap. 6.  
 exponendis delegisti, iisq; per ratioci-  
 nationem, ac discursum tibi applicatis  
 vim adde, & efficaciam hoc, vel simili  
 modo: *Anecessitate*. Scito anima mea su-  
 blime vocationis tuæ institutum carnis  
 delicias, & commoda corporis non ad-  
 mittere: qui enim Christi sunt carnem  
 suam crucifixerunt cum concupiscentiis  
 ad

ad Gal. 5. Veligitur Socii JESU nomini,  
 ac instituto renuntiandum, vel corpus  
 jugi mortificatione castigandum. Hinc  
 Sanctissimus Fundator exigit in 12. Sum-  
 marii lege, ut majus, ac impensius stu-  
 dium cujusque sit quærere in Domino  
 majorem sui abnegationem, & continuam  
 in rebus omnibus, quoad fieri potest, mor-  
 tificationem. *Ab æquitate.* Necessitati ac-  
 cedit æquitas: quid enim æquius, quàm  
 ut ancilla dominari non sinatur? quid  
 æquius, quàm ut equo frænum semper  
 applicetur? quid æquius, quàm ut hostis  
 æternæ vitæ insidians, assiduò atteratur?  
 quid æquius, quàm ut is, qui toties DEI  
 filium occidit, ad mortem saltèm spiritua-  
 lem condemnetur, & cum concupiscentiis  
 suis crucifigatur? *Ab utilitate.* Dic ani-  
 ma mea: nunquid cauterium unius mem-  
 bri lubens admittis, ut plura salves? cur  
 non ergo mortificationem corporis jugi-  
 ter usurpes, ut ab interitu te ipsam ser-  
 ves? infensiolem quippe hostem illo non  
 habes, cujus vires quantò ampliùs mace-  
 ratione attriveris, tantò majorem tibi se-  
 curitatem comparabis. *A dignitate.* Quid  
 excellentius digniùsque est martyrio? hu-  
 jus titulo, ac honore gaudet mortificatio  
 teste Sancto Bernardo, qui Sermone ter-  
 tio in Cantica ait: Genus quoddam mar-  
 tyri

tyrili est, spiritu facta carnis mortificare, illo nimirum, quo membra cæduntur ferro, horrore quidem mitius, sed diuturnitate molestius. *A facilitate.* S. Franciscus Borgias omnia corporis incommoda sibi levia fecit, binos legatos, cognitionem nempe sui, & inferni præmittendo; quanto magis eadem tibi jucunda accident, si amorem DEI, crucem Christi, augmentum meriti, & cælestis præmii magnitudinem respexeris.

25. Quære *Quintò* ex te : an & quantum hætenus talis doctrinæ observans fueris ? & mox super teipsum institues reflexionem, quid à te sit præstitum, aut omissum ? si quod debebas fecisti, excitandi sunt ad DEum affectus laudis, glorificationis, gratiarum actionis, petitionis gratiæ &c. Si verò te defecisse adverteris, eliciendi sunt affectus accusationis, doloris, desiderii emendationis &c. Horum in materia proposita sequitur exemplum. Tam validis rationum momentis, cum suffragari, voluntatémque inflectere debeas anima mea, vide jam, sensúsque corporis tui sine fuco scrutare : num hætenus oculos à rerum vanarum intuitu, manus ab objectorum delectabilium attractu custodieris ? num intemperantem linguæ licentiam à colloquiis superfluis, contra-

di-

ditionibus crebris, & punctoriis verborum aculeis continueris? num inordinato gulæ appetitui, extra mensæ tempora cibo, & potu furtivo indulseris? num matutinum surgendi torporem alacri excusatione somni viceris? num calceos malè pedibus accommodos, obsoletosque aut vestem attritam, minúsquè corpori aptatam directè vel indirectè acceptare renueris? num aut sævientis brumæ rigorem, aut caloris æstivi intemperiem, aut membri alicujus dolorem, æquò animò, aut è contrà, impatienter sustinueris?

26. Peracto examine, agnitisque erratis congrui sequuntur affectus. *Primò Accusationis*: Et ecce ò cæcitas, & amentra mea! Socii JESU nomen porto, & à mortificatione carnis, & sensuum tam procul disto; corpus meum tam molliter tracto, neque ut servum rebellem servituti subjicio; carnem spiritui parère, tanquam ancillam servire Dominæ non cogo: hinc si inclementior sit aura, indignor; si mensa frugalior, aut cibus insultior, murmuro; si exiguâ doloris molestiâ afficiar, gemo, & lamento; si modica fame, aut siti urgear, mox ingluviem explere conor; si levi tangar injuria, illico linguam in aculeos, morsus, & contumelias effundo. *Secundò doloris*: O circumcidè JESU,



fu, quàm remotus, ac diffitus sum à te!  
 quàm invisa, durâque accidit circumcisi-  
 onis tuæ æmulatio! nomen Socii JESU fer-  
 re placuit, & spiritu facta carnis mortifi-  
 care displicuit; ah pœnitet me, quòd ab  
 imitatione tua recesserim, quòd carnem  
 meam cum concupiscentiis non crucifi-  
 xerim, quòd assumpti nominis mensuram  
 non adimpleverim. Detestor igitur ca-  
 citatem meam, averfor impudentiam me-  
 am, quòd tam serò nimis tandem sapere  
 didicerim. *Tertio desiderii mortificationis:*  
 O dulcissime JESU, cujus socium me pro-  
 fiteor tibi quoque deinceps vitâ, & mori-  
 bus consentire desidero, tibi cohibitione  
 sensuum reddi similis exopto, tibi deni-  
 que corpus meum hostiam placentem, vi-  
 ventem, sanctam exhibere cupio: sonet i-  
 gitur hæc vox desiderii in auribus tuis, ut,  
 secundum quod desidero, fiat mihi.

27. Quære *sexto* ex te: quid tibi in fu-  
 turum sit particulariter proponendum?  
 & statim convenientes dispice praxes,  
 circumstantias, & occasiones, in quibus  
 ejusmodi doctrina cum magno fructu exe-  
 cutioni dari possit. Quibus tibi objici-  
 endis diu immorandum non est, nè ani-  
 mus ad alia abstrahatur. Demum elicies  
 firmum animi propositum ad talem in par-  
 ticulati determinatam circumstantiam, &  
 occa-

occasionem directum, in qua maximè opus habes tali virtutis exercitio. En habes in assumpta materia hujus rei exemplum. Ratum igitur, fixumque statuo ô mi Salvator, quòd deinceps Socii JESU titulo, ac nomini mortificationem corporis sociabo; & quia nisi sensualitatis meæ ulcus mortificationis ferro ad vivum tangam, efficax remedium curando malo non afferam, hinc cum tua gratia firmiter decerno: quòd clàm, aut furtivè nunquam deinceps in edendo, aut bibendo gulæ ferream; nec ullis unquam esculentis, aut poculentis extra triclinii locum, & statuta per ordinationes Superiorum tempora famem, ac sitim, licèt urgentem, ac permolestam levabo.

28. Quære *septimò* exte: quid industriæ ad efficacem propositi executionem sit adhibendum? hæc industria consistit, vel in remotione impedimenti, quod executioni illius ob stare posset; vel in defectu positivi medii, quod ad ejusdem faciliorem praxim servire posset. Ex his itaq; delige unum, quod efficacius esse cognoveris, hoc vel simili modo: Nè verò efficax hoc voluntatis meæ decretum urgente fame, ac siti ab executione deficiat, pro medio, ac industria tuos ô mi Jesu exaltatos in fame, ac siti cruciatus piè recollam,

lam, iisque hanc mortificatæ gulæ molestiam tanquam infinito thesauro obolum adjungam, & sic etiam tibi offeram: O JESU mi, hancego famis, sitisque molestiam, velut exilem doloris guttulam, in tuæ passionis mare immergo, placeat tibi propter te, dum tui gratiâ sic vinco me.

29. His rite præmissis succedit proclausula meditationis Colloquium cum DEO, aut Christo, vel Beatissima Virgine, aut Sanctis DEI; in quo non solum pro acceptis in oratione beneficiis redduntur DEO gratiæ, sed etiam Cælestis implo-  
ratur gratia ad ea opere complenda, quæ intellectus agenda cognovit, & voluntas exequenda proposuit. Quò autem pluribus, ardentioribusque colloquium abundat affectibus, tantò melius est, ut in subjecto videbis exemplo: O Bonitas infinita DEus meus, summas tibi reddo, quas possum, gratias, quòd orationem meam clementer audire, intellectum luce veritatis tuæ illuminare, voluntatem salutarimortificandæ carnis desiderio inflammare, & ad æmulanda circumcisi JESU vestigia efficaciter impellere dignatus sis. Pro quibus immerenti mihi collatis à te beneficiis, cùm laudare bonitatem tuam dignè nequeam, magnificet te mei loci anima Beatissimæ Virginis Mariæ, laudant

dent ardentissimo affectu Seraphini, benedicant omnia opera tua, à quibus lauderis, & extollaris in sæcula. Quia verò memor insufficientiæ meæ, ac fragilitatis humanæ conscius sæpe sæpius experientiâ didici, quàm procul distet ab executione propositum, & ab opere desiderium; ideo clementiam tuam oro, & obtestor, efficacem immerenti licèt præbe gratiam, ut, quæ in hac meditatione te inspirante cognovi, & statui, etiam reipsa fideliter, & integre te adjuvante præstare valeam.

30. Peracta meditatione instituitur super illam reflexio. *Primò*: An in DEI præsentia constitutus orationem & præludia præmiseris? *Secundò*: an in discutienda veritate fidei modum, & ordinem rite tenueris? *Tertiò*: an seria & constanti potentiarum applicatione per totum meditationis decursum usus fueris? *Quartò*: an plus temporis discursibus intellectûs, quàm piis motibus voluntatis tribueris? *Quintò*: an & quantum occurrentibus mentis evagationibus obstiteris? & quænam earum causæ fuerint? si bene successerunt omnia, DEO redde gratias; sin aliquam admisisti negligentiam, dole cum emendationis proposito. Reflexioni succedit fructuum annotatio, hoc



hoc pacto : *Primò* : Scripturæ textus ad  
meditandum assumptus ponitur. *Secundò* :  
Scopus Meditationis adscribitur. *Tertiò* :  
Motiva adduntur, ex quibus illud primò  
locò adjicitur, quod per discursum ex ve-  
ritate fidei expensa deductum est, huic  
cætera subnectuntur. *Quartò* : Præcipui  
affectus breviter specificantur. *Quintò* :  
Particulare propositum declaratur. *Sex-  
tò* : Industria executioni subserviens ad fi-  
nem collocatur. Hæc patebunt in Exem-  
plo clariùs.

31. Fructus assumptæ meditationis.  
Vocatum est nomen ejus JESU. Luc. 2.  
Scopus Socii Jesu titulo, ac nomini morti-  
ficationem corporis sociabo. *Motivum 1.*  
Nomen JESU ipsi Christo circumcissione  
carnis constitit, quâ tamen ille nec eguit,  
nec egere potuit, quantò magis ego Socii  
JESU titulo, ac nomini mortificationem  
corporis sociare debeo, qui proclivem in  
malum naturam habeo. *Motivum 2.* Qui  
Christi sunt, carnem suam crucifixerunt  
cum concupiscentiis suis. ad Galat. 5. Er-  
go Christi Socius esse nequeo, nisi mor-  
tificationem JESU in corpore circumfe-  
ram. *Motivum 3.* Sicut ancillam famu-  
lari, equum frænari, hostem atteri est  
æquum; ità quoque mortificationi car-  
nem subdi justum est. *Motivum 4.* Cau-  
terium

terium unius membri admittitur, ut plura salventur: cur non castigetur corpus, ut anima salvetur? *Motivum* s. & *6tum* brevitatis gratiâ hîc non adjicitur. *Affectus præcipui*: fidei, petitionis, exhortationis mei, oblationis, confusionis, doloris, desiderii &c. *Propositum* statui igitur nunquam deinceps velle clâm in edendo, aut bibendo gulæ servire; nec unquam extra triclinii locum, ac statuta per ordinationes superiorum tempora, famem, sitimque, licet urgentem, ac molestam levabo. *Industria*: fame ac siti urgente, Christi famem, ac sitim piè recolam, ejusque patientiæ meam uniam.

## CAPUT VI.

### *De Affectuum in Meditatione exercitio.*

32. **Q**Uandoquidem præcipuus meditationis fructus, quem illa immediate respicit, in piis animi motibus, & inflammatis affectibus consistit; idcirco nonnulla scitu necessaria pro faciliiori eorundem praxi, & exercitio declaranda per varias censui quæstiones. Quia verò in usu Avanciniano tria affectuum alphabetæ verè aurea, juxta tres perfectionis vias digesta,

digesta, cum practicis eorundem exemplis fructuosissimè illustrata ad manum habes, hinc eorum familiarem usum valde sva-  
deo: nè autem ego quoque meis desinam partibus, practica nonnullorum affectuum exempla sequenti capite proponam.

33. Quæres *Primò*: Quid sit affectus?

R. Affectus, de quo hìc loquimur, est certa quædam commotio cordis, sive sanctus quidam ardor in anima excitatus, aut ex solo motu, & secreta impressione gratiæ Spiritûs Sancti, aut ex præmissis considerationibus intellectûs. Duplex porrò est genus affectuum nempe prosecutionis, quibus bonum honestum appetimus; & fugæ, quibus malum inhonestum averfamur: in quorum excitatione observandum est, ut non sistat animus in otioso præcisè quodam gustu, & infructosa duntaxat expensarum veritatum affectione; verùm progredi ulterius debet ad solida, & efficacia virtutum exercendarum proposita, in quibus totus bonorum affectuum consistit fructus, uti superius num. 4. uberius expositum est.

34. Quæres *Secundò*: Quomodo producantur? R. duobus modis. *Primus* est communis, & ordinarius, atque ex parte dependens ab humana industria, quò

meditans anima postquam fidei veritatem bene expendit, ac ruminavit; movetur ex ea ad virtutis cujuspiam desiderium, amorem, ejusque exercendæ propositum: quod adeò svavi, ac connaturali sit modo, ut absque ulteriori ad industrias, & praxes affectuum reflexione, quàm primùm anima bonum, aut malum perceperit, statim ex seipfa illud amplectatur, hoc verò aversetur: sicuti res pulchras, ac deformes sufficit præcisè videre, ut illæ placeant, hæ verò displiceant. *Alter modus* est peculiaris, qui fit per extraordinariam infusionem cujusdam luminis immediatè à DEO procedentis, unicò momentò intellectum hominis adeò illustrantis, ut rem clariùs multò perspiciat, quàm si tres, aut quatuor horas continuas in meditatione insumpsisset; velut radius quidam solaris in conclave aliquod incidens, plùs illuminat, quàm si plures illic candelæ forent accensæ. Multi hoc genus internæ commotionis experiuntur, etiam priusquam sciant, quid sit oratio; uti accidit non rarò quibusdam adolescentibus sæcularibus, quibus DEus inspirat mundo valedicendi propositũ, illis quippe interdũ, quasi in ictu oculi omnia mundi pericula, ac misérias objicit, simulque svavem, ac fortem deferendi sæculum imprimit eorũ animis inclinationem.



35. Quæres *Tertiò*. Quid sit affectus purè Spirituales? quid Spirituales simul, & sensibilis? & quomodo nascantur? R. affectum purè spiritualem esse, quem non nisi sola degustat voluntas, neque in partem inferiorem hominis, id est in appetitum sensitivum transfunditur. Affectus sensibilis, simul ac spiritualis est ille, per quem non solum pars superior hominis, sed & inferior, hoc est tam voluntas, quam appetitus sensitivus commoventur; quod duobus contingit modis: primus est: quando objectum meditationis est imaginarium, & sensibile, tunc enim appetitus sensitivus, qui in parte inferiori correspondet imaginationi (sicut voluntas in superiori parte respondet intellectui) primò commovetur, hacque commotione non parùm juvat ad affectus voluntatis excitandos. Alter modus est: quando argumentum meditationis est purè spirituale, ità ut valde parùm operetur imaginatio, tunc enim voluntas primò sentit illas sanctas commotiones, quæ tamen nonnunquam ad eò magnæ sunt, ut anima, quæ in superiori parte illis abundat, per redundantiam in inferiorem partem aliquid inde transfundat. Aliquando ob indispositionem, vel repugnantiam inferioris partis, ejusmodi commotiones sola in parte su-

periori se continent; neque appetitum sensitivum hominis commovent.

36. Quæres *Quartò*: Undenam meritum, & perfectio affectuum desumatur? R. Pro certo tenendum est, quòd meritum, & perfectio affectuum non ex aliqua sva-ritatis experientia, & dulcedine sensibili, sed ex voluntatis bonæ efficacia desumatur, in qua consistit tota vis, ac ratio virtutis, meriti, ac sanctitatis. Adeoque possunt cum desolatione, & repugnantia, partis inferioris perfectissimi affectus voluntatis elici: sic Christus Redemptor noster in horto usque ad sudorem sanguineum desolatus hoc affectu resignationis: non mea, sed tua voluntas fiat, æterno Patri summè placuit. Et tu ejus membrum placebis, si absque ulla dulcedine, & gustu eundem affectum, aliòsque solidarum virtutum elicias. Si autem sva-ritate sensibili subtracta nescis, aut grave tibi videtur, in oratione perseverare, certum habe, quòd non purè DEum quæras, & ames. Affectuum proinde sva-ritas, ac dulcedo, cum non sit meditationis fructus, ac finis, non est inordinate quærenda, in qua sæpe tyrones errant, amoris proprio etiam in spiritualibus nimis intenti.

37. Quæres *Quinto*: Unde proveniat, quòd

quod ordinariè unus præ altero faciliùs moveatur in affectus? R. Id fieri *Primò* ex teneritudine indolis, & naturæ facilioris mollitiæ ad recipiendas quorumlibet ob-  
jectorum impressiones: qui hujusmodi sunt generis, & complexionis, meditatio-  
nem interrompere debent, ubi nota-  
biliter se commoveri sentiunt: res enim infructuosa foret, omiſſis iis, quæ magis necessaria sunt, totum orationis tempus impendere lachrymis, ſvavioribùsque ani-  
mi affectibus, qui in talibus hominibus sunt ordinariè nonniſi effectus naturæ. *Secundò*. Provenire id poteſt ex eo, quòd quis jam plurimam rerum divinarum notitiam per antecedentes meditationes habeat, at-  
que adeò ſtatim in meditationis principio dimidium facti obtineat, hoc eſt intel-  
lectum ſentiat circa propositam materiam, quàm illuminatiſſimum, atque inſtructiſſi-  
mum. Tales indulgere potiſſimum de-  
bent affectibus, qui ſi in vehementes nimis exuberarent ardores, inſtar ignis cor adu-  
rentis, moderandi erunt, ſive activitatem animi temperando; ſive etiam, ſi aliter ignis ille temperari nequiret, argumen-  
tum meditationis commutando.

38. Quæres *Sexto*: Eſtne neceſſarium, ut in iis, quos producimus, affectibus ſemper DEO loquamur in ſecunda perſona? R.

Nequaquam, sed per Apostrophen jam alloqui possum, Beatissimam Virginem, Angelum custodem, vel aliquem ex Sanctis; jam creaturas alias, potissimum verò nosmetipsos arguendo, confundendo, excitando, impellendo &c. expedit nonnunquam, ut absque eo, quòd vel DEO, vel nobis ipsis, aut rebus aliis loquamur, excitato affectui, quo efficaciter commoveri nos advertimus, in secreto quasi cordis silentio ulteriùs insistamus, eique locum demus, donec in eo suam animi satisfactionem habeat. Sic etiam expedit subindè, tunc scilicet, quando aliquis ob nimiam intellectûs sui fœcunditatem, primò statim intuitu totam assumptæ veritatis fidei materiam intimè perspicit, ut simplicem mentis suæ oculum, seu intuitum, absque ulteriori discursu in eam defigat; affectumque, quo se commoveri senserit, foveat. ?

39. *Quæres Septimò*: Quomodo fovendi sint affectus ubi notabiliter illi remissiores facti fuerint? R. Eos rursus excitandos esse instar illius, qui ligna igni superaddit, ipsùmque sufflat, nè restingvatur: ità & nos ignem affectuum sufflare debemus, per superaddita motiva, eorùmque expansiones, juxta doctrinam sequenti capite, & fontibus motivorum, &



& affectuum tradendam, quodd si quandoque voluntas emotam se senserit, nescio quo amore DEI molli atque otioso, qui nihil agere, aut pro eo pati velit, tunc urgentioribus illa motivis impellenda est, ad aliquid pro gloria DEI aggrediendum; v. g. ad reprimendam aliquam, quæ cæteris prædominatur, inordinatam passionem, aut exercendum virtutis cujuspiam actum, naturæ quamvis valdè contrarium; cum in hujusmodi solidis, & efficacibus animi propositis totius consistat fructus affectuum, ut superius abundè declaratum est.

40. Quæres *Octavò*: Quid faciendum, ubi voluntas ex meditatione nullo modo commovetur in affectus? R. Nequaquam impatiente animo id ferendum, sed humiliter, & cum resignatione tolerandum; hoc ipsum enim est, in quo potissima pars consistit præsentis nostri profectus, quem vult DEus, ut referamus ex meditatione. Et sanè profectus iste nequaquam exiguus censeri debet, nam humilis illa resignatio quàm maximè placet Divinæ bonitati, quod sanctissimo ejus beneplacito tam promptè, fideliter, & constanter pareamus. Quod si nec istos resignationis actus elicere valeamus, saltèm eorum desideria concipere debemus: si tandem

B 6

neque

neque hujusmodi desideria concipere possemus, rogandus erit DEus, ut ipse seipsum laudet in nobis eo modo, quo ipse desiderat. Cogi igitur in tali statu voluntas ad affectus non debet, utpote potentia libera, quæ cum violentia impelli nec potest, nec debet.

41. Quæres *Nonò*: Quid agendum est, ubi eum, quem sperabamus successum, atque in meditatione satisfactionem non experimur? R. Sequentes praxes cum fructu usurpari posse. Prima est: ut simili in casu non afficiamur rebus, quas meditati sumus juxta infirmam earum notitiam, quam nos de iis habemus, sed juxta quod illas cognoscit DEus, hac vel simili ratione dicendo: desidero Domine talem, vel talem actum virtutis exercere pro gloria tua, non quidem affectu exiguæ meæ, quam habeo, notitiæ, sed eum desiderio te, quantum quidem tu ipse mereri nôsti, glorificandi.

42. Altera praxis est, offerre Divinæ Majestati sensus nostros imperfectos, in unione eorum, quos Dominus noster IESUS CHRISTUS super eadem materia habuit perfectissimos: quin imò distractiones quoque nostras involuntarias, in recognitionem divinissimæ illius attentionis, quam ipse semper habuit suis in orationibus;

bus; tentationes nostras importunas, in honorem infinitæ sanctitatis ipsius; inquietudines nostras, in honorem perpetuæ illius, & invariatae tranquillitatis; imperfectiones nostras, quæ quidem involuntariæ nobis sunt, hac ratione referendo in gloriam contrariarum virtutum, quæ sunt in sanctissima illius Humanitate. Hæc enim glorificandi DEUM methodus ipsi, quàm acceptissima, nobis verò quàm utilissima evadet.

## CAPUT V.

*Exempla & praxes diversorum affectuum proponuntur.*

43. **V**arii affectus paupertatis, ex consideratione Christi nati. 1. Ah parve puer, magne DEUS! potestne quis nasci pauperior, quàm tu sis natus? potestne quis vivere pauperior, quàm tu vixeris? potestne quis mori pauperior, quàm tu sis mortuus? tu dives eras, & omnium egenus factus es! ego pauper sum, & abundare appeto: quis non iudicet iniquum esse, ut mancipium commodius vivat, quàm Dominus. 2. O pauperime JESU! quàm difformis extitit exemplo tuo hætenus paupertas mea! statum

quidem te misericorditer vocante mutavi, sed mutato statu cupiditatem habendi non exui, sed eam in Religionem invexi, ubi vilia appetens me vilem effeci. Quid refert, quòd non sim cupidus nummorum, si interim inordinatè cupidus existam librorum, munusculorum, esculentorum &c. 3. O si inæstimabile paupertatis pretium deinceps meliùs agnoscerem, eamque velut Matrem juxta institutum meum diligerem! cupio tibi posthac egentissime JESU! consimilis affectu simul, & effectu reddi. 4. Statuo igitur in futurum reje-ctis omnibus superfluis sola duntaxat necessaria admittere, & ex his, quæ viliora in domo fuerint, gaudenter eligere. 5. Fac ô mi JESU, ut, sicut hæc cum gratia tua dedisti velle, ità quoque des mihi exequi, & perficere.

44. Varii affectus mortificationis ex-consideratione circumcisionis Christi. 1. Laudo te Redemptor mundi pro prima sanguinis tui in tenerrima ætate profusione, cum tua caro immaculata, pœnam circumcisionis, quam non meruit, ultro sustinuit. O lapsus Adæ, quàm es amarus JESU meo! ego peccavi, & tu Domine pœnam exolvis; ego in concupiscentia conceptus, & natus sum, & tu in te suscipis ultionem! 3. Nunquid poteras  
ô spon-

ô sponse sanguinis, cum DEus esses, citra periculum omnia corpori commoda indulgere? non egebas hoc medio ad subji- ciendum rationi corpus, quod Divinitas moderabatur; & tamen cruentum circum- cisionis vulnus admisisti. 4. Quid ad hæc nos anime? num, quâ innocuum caput præcessit, pes nefarius subsequi detrecta- bit? scis, quòd vitiata sit tibi natura, & in malum proclivis; scis, quòd rationi re- bellet corpus, & in peccata inducat, & adhuc illud fovere audebis? 5. Exeste igitur ex nunc semper vanissimæ carnis deliciæ: nolo, nolo amplius illicitis sen- suum oblectamentis servire; volo posthac firmiter rebelle hoc corpus jugi mortifica- tionis cultro subicere, ejusque indomi- tos sensus, cum vitiis & concupiscentiis crucifigere. 6. Hoc est ardens animi mei propositum, mi JESU! quod, ut efficaci gra- tia confirmes, oro suppliciter.

45. Varii affectus obedientiæ ex consi- deratione subjectionis Christi in Nazareth. 1. O quis recuset amplius subdi homini- bus propter DEum, quando videt in Na- zareth annis octodecim DEum immensum fuisse subditum hominibus in exemplum nostrum? 2. Jam probè intelligo, Magi- ster Sanctissime, qualis esse debeat subje- ctio mea, dum te observo non personas  
homi-



hominum in parendo, sed DEum Patrem, cui, & propter quem in omnibus obediebas, purè duntaxat respexisse. 3. Tolle, obsecro, à me inordinatam hanc rerum, personarumque acceptionem; & da, ut non solùm prælatis meis, sed etiam substitutis eorum Officialibus ità deinceps paream, ut in eorum voce, non imperium quoddam humanum, sed in ea vocem jubentis DEI agnoscam, & sequar. 4. Parum interest, cujus operâ id, quod jubeor, mihi imperetur; parum, quousque se extendat, quod imponitur mandatum; sufficit, quòd intelligam ità DEum per Vicarios suos id velle, quod jubeor. 5. Si in fide suspectus censeretur ille, qui aureum solummodo venerari crucifixum vellet; cur tu anima mea non suspectam habeas obedientiam tuam, si doctis, & magis perfectis obedire velis? 6. Ut igitur ad tuum mi JEsu exemplum accedam propiùs, humiliter substitutis posthac, infimis licèt, parebo Officialibus, postquam tu adeò promptè submisisti te, vilissimis etiam homuncionibus.

46. Varii affectus humilitatis ex consideratione Christi discipulorum pedes abluentis. 1. O inauditum hætenus in mundo, cælóque spectaculum! ecce Majestas illa, coram qua Cælum, & terra tre-

mun

munt, ante discipulorum pedes genua flectit, eorúmque sordes abluit, & linteo extergit; & tu ô vilis homuncio erubescas adhuc eò te dimittere, quò se Deitas ipsa depreffit? 2. Disce hinc arrogans anime, quàm indigni sint questus tui, quos effundis, si inglorius lateas, si ad viliora domûs munia appliceris, si non modò æqualibus, sed fors etiam te inferioribus postponaris. 3. Putásne ea, quæ tibi DEUS clementer indulgit, talenta esse talia, quæ cum cælestibus thesauris comparari possint? proinde si quid, & quantum potes, te humilia, tam profundè enim de te non senties, quin abjectius aliquid mereare. 4. Agnosco coram te DEUS vilitatem meam; confiteor, quantum possum, abyssalem nihili mei contemptibilitatem, ideo infra omnes secundùm id, quod ex me sum, & habeo, libens me demitto, & abjicio. 5. Absorbe ô abyssus humilitatis infinita abyssum superbiæ meæ, & hoc saltèm tribue, ut nihil altum sapiam, & ad abjecta quæcunque munia libens me submittam. 6. Quod ut assequar, statuo crebrius mentis meæ oculos in abyssum vilitatis meæ defigere, Christumque ad piscatorum pedes depressum recollere, ut efficaci hoc medio fastum exuam, & vilia quæcunque promptius admittam.

47. Varii affectus patientiæ ex consideratione Christi patientis. 1. Quid hæres, patique refugis anima mea? projice te in extensa brachia Salvatoris, & cum eo cruci configere; non est discipulus super Magistrum, aut servus major Domini. 2. Si ille in causa salutis tuæ, velut innocens agnus tam dira passus est; quid tibi tot scelerum reæ durum videri & accidere potest? quidquid pateris, nihil est in comparatione mali, quod commisisti, in comparatione boni, quod amisisti, in comparatione pœnæ, quam promeruisti. 3. Heû pudor, & dolor! sequuntur alii duces suos, ut leve stipendium referant, & Christus quò ducit? ad immortalem Cæli gloriam, & tamen, ut eam consequaris, cum onere crucis eum sequi detrectas: gestis habere partem cum Christo in Patria, & recusas consors fieri tribulationum in via? 4. O patientissime JESU, quis te novit meliùs reprobare malum, & eligere bonum? si ergo in tribulationum cruce malum latèret, ànne eam elegisses? nunquid passionis calicem amantissimæ Matri tuæ, & Sanctis propinâsses? 5. Jam ergo, ô mi JESU! ab hoc die tecum pati volo, tecum affligi, & crucifigi cupio. Quidquid deinceps acciderit sensibus meis contrariû, naturæ adversum, appetitui ingratum, carni

carni asperum, famæ, ac nomini injuriosum, omnia infractò perferam animò.  
 6. Ecce mi DEus, paratum cor meum ad omnes afflictionum cruces! ure, seca, cæde, crucia, lubens perpetiar, ut tibi spinoso capiti membrū conforme inveniar.

48. Varii affectus Charitatis erga DEum ex consideratione illius tanquam finis ultimi. 1. O DEus principium omnium, & finis ultimus, qui me creâsti ex nihilo, ut amem te, & serviam tibi; ecce pronus, & supplex adoro te, subjicio me tibi usque ad imum nihili mei, secundum interminabilem tui à me distantiam. 2. Laudo, & benedico te fontem bonorum omnium, & quia vis amari à me, & cor meum avidè postulas, illud tibi totum cedo, & dono, ut jam meum non sit, sed tuum. Utere illo ad omne arbitrium tuum, postpositò omni arbitriò meò, quod in tuum transfero, & tuæ voluntati prorsus tradò, & resigno. 3. Sed cur tantopere desideras cor meum DEus meus? quia nimirum pro nihilo habes ore, & lingvâ diligere, si cortecum non sit; nihilo ducis obsequium, si non videas operantis affectum: hoc est, quod petis, non tam enim manum respicis, quàm animum, non tam donum consideras, quàm donantis affectum. 4. Si filius amat patrem, quia ab illo, quod est,  
 acce-

accepit; si membra amant caput, quia in eo, quod sunt, conservantur ab illo; si effectus omnes amant suas causas: quæ ratio ex omnibus deest tibi DEUS meus, ob quam non debeam toto corde amare te, qui mihi dedisti totum esse, posse, operari, & conservari? s. Utinam nulla haecenus fuisset, nulla deinceps sit vitæ meæ actio, nulla corporis & animi motio, nulla sensuum, & potentiarum functio, quæ non fuerit, aut sit, posthac ad maximam tui gloriam, amorem, & beneplacitum! hoc volo, hoc intendo, hoc, quâ possum efficaciam, in futurum decerno, ut instar thymiamatis consumar totus in acceptissimum Divinæ Majestatis tuæ holocaustum.

49. Varii affectus resignationis in voluntatem DEI. 1. O supreme rerum omnium Domine, en quàm possum perfectissimè, voluntatem meam in beneplacitum tuum transfundo; sententiæ tuæ meam subjicio! quod tibi placet, approbo; quod negas, dimitto; quod das, accipio: ad omnem arbitrii tui nulum cereus occurro. 2. Ah satis hucusque meus fui, qui tuus in omnibus esse debui! satis diu injurius in te extiti, qui inordinato voluntatis meæ arbitrio toties indulsi, meisque animæ potentiis, ac corporis sensibus



bus obsequii tui ministris abusus sum. 3. Detestor iniquam adeò judicii mei, ac voluntatis proprietatem, ac me totum in justum transfero: suscipe corpus in victimam, cor in templum, vitam in holocaustum, vires omnes, & facultates in beneplaciti tui obsequium. 4. Statue igitur de me ô DEus, quidquid tibi placuerit, cui placere non potest, nisi salus mea, utere me velut re tua, & mancipiô; nunquam tua circa me voluntas ab æterno nisi optima fuit, nunquam deinceps erit alia; mea ex opposito nunquam hætenus bona fuit, nec esse potest, nisi tuæ conformis. 5. En ô Domine ut jumentum factus sum apud te; vitam mihi, ut voles, produce, aut contrahe; morbos pelle, autingere; effer me honoribus, vel preme contemptu; operum meorum successum promove, vel everte; amores hominum erga me excita, vel odia permitte; scientiam, eruditionem, famam adde, vel adime; nihil amplius horum precor, aut deprecor; omnia tui arbitrii sponte, ac libens facio. 6. Id unicum ô DEus, tuis in me beneficiis adde, ut nihil deinceps mihi placeat, quod tibi displiceat; nihil mihi displiceat, quod placet tibi.

50. Varii affectus Præsentia DEI ex consideratione ejusdem. 1. Quid mihi est

est in Cælo ô DEus immenſe, & à te quid  
 volui ſuper terram? quæſivi rot annis,  
 quem diligit anima mea, & non inveni,  
 quia malè quæſivi: tu ſemper eras me-  
 cum, & ego rarus tecum. Palabundus  
 hucusque per res creatas exerravi, & te  
 Creatorem, intra me habitantem non ſu-  
 ſpexi. 2. Væ tempori illi, quando te non  
 cognoſcebam ſummum bonum animæ  
 meæ; væ cæcitati illi, quando te non vi-  
 debam, néque intuitu tuo à patrandis ma-  
 lis deterrebar! deteſtor, retracto, abomi-  
 nor veſaniam meam in tam profunda DEI  
 præſentis oblivione toties admiſſam. 2.  
 Quò ibo à Spiritu tuo Domine DEus me-  
 us, & quò à facie tua fugiam? ſi ascen-  
 dero in Cælum, tu illic es! ſi descenderò  
 in infernum, ades: neque te Cæli Cælo-  
 rum capere poſſunt. Oculi tui plùs luci-  
 diores ſunt Sole, quibus grefſus meos, at-  
 que ſemitas jugitur conſideras; quomo-  
 do ergo obliviſci unquam poſſum tui? 4.  
 Si viva fide crederem, te hîc, & ubique  
 præſentem eſſe, & omnia opera mea, inti-  
 mæſque cogitationes perſcrutari, nihil  
 que occultum eſſe oculis tuis, non aude-  
 rem te audiente, & vidente ea cogitare,  
 loqui, & agere, de quibus in conſpectu  
 hominum erubeſcerem. Quanta enim  
 puritate ô infinita puritas! coram te eni-

tere debeo, in cuius conspectu Coeli non sunt mundi, & in cuius faciem supremi Spiritus Seraphici respicere non præsumunt. 5. Absit igitur ô Domine, ut aliquid posthac indignum conspectu tuo admittam, absit, ut te inspectante id agere præsumam, quod in virorum gravium oculis committere metuerem; absit, ut ullo loco, quantumvis secretissimo tui penitissimè omnia inspicientis obliviscar. 6. Fac ô mi DEUS, ut potius oblivioni detur dextera mea, quàm ut non recorder tui omnibus diebus vitæ meæ!

## CAPUT VI.

*De fontibus motivorum, & affectuum.*

51. **E**Xperientiâ constat, quòd inventis à se motivis, & rationibus, quisque potius impellatur, quàm ab alio sibi traditis, eò, quòd illa plerumque magis penetrentur, & animo profundius insideant. Quare dum in Avanciniani Ufus punctis mysteria fidei, ac veritates proponuntur, eæ nonnisi succincta discussione ad morum doctrinam accommodata breviter declarantur; reliquus itaque labor meditaturis incumbit, tum ut con-

veni-

venientem exinde conclusionem practi-  
cam deducant, eamque in meditationis  
scopum forment, tum ut nonnulla alia  
commotiva ad scopum meditationis ser-  
vientia, & ad excitandos affectus idonea,  
quantum necessaria fuerint, ipsi investi-  
gent.

52. Proderit igitur ad communes sa-  
cræ Rhetoricæ locos, tanquam Asceticos  
motivorum fontes recurrere, ut his me-  
ditatio non solum ad amplificandos dis-  
cursus, verum etiam ad promovendos af-  
fectus irrigetur uberius; cum enim offici-  
um intellectus sit per ratioinationem, &  
discursum ex veritate fidei credita, tan-  
quam ex principio, conclusiones practi-  
cas, ad morum virtutumque perfectio-  
nem accommodatas, quæ in priori verita-  
te, tanquam semine fructus includuntur,  
deducere, easque efficacibus motivis sta-  
bilire, quibus inducatur voluntas ad pro-  
secutionem boni, vel ad fugam mali; pro-  
derit multum Tyronibus nondum in me-  
ditando exercitatis, ad manum habere lo-  
cos quosdam fecundiores, è quibus effi-  
cacia ad persvadendam sibi morum do-  
ctrinam ex fidei veritate deductam, erue-  
re valeant motiva.

53. Praxis *Prima* eruendi motiva fir-  
mando meditationis scopo idonea, consi-  
stis

stet in recurſu ad ſequentes locos Orato-  
ribus ſacris communes. 1. Ad Authori-  
tatem Sacræ Scripturæ. 2. Ad testimo-  
nia Sanctorum Patrum. 2. Ad ſinem In-  
ſtituti proprii, ejusque votorum, legum,  
ac conſtitutionum obligationem. 4. Ad  
exempla Chriſti Domini, Beatiffimæ Vir-  
ginis, & Sanctorum ſuæ præſertim Reli-  
gionis. 5. Ad comparationes, & ſimili-  
tudines. 6. Ad cauſas, & effectus. 7.  
Ad contraria, & repugnantia. 8. Ad  
antecedentia, & conſequentia. 9. Ad ad-  
juncta, & circumſtantias. Quis, quid,  
ubi &c. Nè verò eadem ſemper recur-  
rente methodo ſaſtidium meditantibus  
generetur, operæ pretium duxi, duas ad-  
huc adjicere praxes, ad quas tum pro  
diverſitate ſuorum ingeniorum, tum pro  
facilitate quærendorum motivorum re-  
currere Tyrones poſſint.

45. Secunda praxis alterà facilior, & in-  
cipientibus etiam rudioribus accommo-  
datior, in ſequentibus ferè conſiſtit capi-  
ſibus. I. Expendat meditans, quid a-  
mico hac in re conſulenti, vel aliis in ma-  
lo pertinacibus, ſvaſurus eſſet? quibúsque  
rationibus ad propoſitæ virtutis exerci-  
tium eoſdem inducturus eſſet? his ſibi ap-  
plicatis idem ipſe facere decernat. 2. Con-  
ſideret, quid in morte? quid in judicio?

C

quid



quid in ipso æternitatis felicis, aut infelici aditu se fecisse velit? 3. Revolvat animo, quid Christus ipse hujus vitæ calamitatibus nostri causâ subiectus, tam verbò, quàm exemplò docuerit, ad exercendum ejusmodi virtutis actum, aut vitii fugam. 4. Recogitet, quomodo sancti exemplò suò in ejusdem virtutis studio sibi præverint? quod illi potuerunt non ex infirma sua, & corruptibili natura, sed ex Dei gratia, cur idem non possit ipse in brachio excelli? 5. Pensitet, an non id frua deat augmentum præsentis meriti, magnitudo futuri præmii, totque alia à Deo collata in te beneficia, tam universalialia, quàm particularia? 6. Trutinnet, an non hoc exigat finis creationis, titulus religiosæ vocationis, ratio Instituti proprii, obligatio votorum, legum, ac religiosæ perfectionis? 7. Ponderet, quàm gloriosum sit Deo amicum esse, Christo autem dilecto ejus filio, tam hic, quàm in æternum esse simillimum. Hæc, & alia ad excitandum universè discursum, affectusque faciliùs promovendos utiliter servire poterunt.

55. *Tertia* praxis valde idonea conquerendorum motivorum complectitur sequentes quinque fontes, quos suppeditat ad cujuscunque virtutis exercitium, aut vitii fugam:

fugam : Necessitas , utilitas , dignitas , seu honestas , æquitas , & jucunditas , sive facilitas . Qui fontes cum suis contrariis uberem præbent intellectui motivorum copiam . Quod ut efficacius fiat , poterit doctrina talis ad alios primum applicari , dicique v. g. quid si alius , hoc vel illud faceret , an non insigni laude , meritò , præmiò ; aut è contrario , reprehensione , & pœnâ dignus foret ? postea ad se fiat conversio , expendaturque , quantò magis sibi ejusmodi doctrina conveniat ex ejusdem necessitate , æquitate , dignitate , utilitate , facilitate . Ex quibus tamen quinque fontibus non est opus , ut motiva semper ex omnibus sumantur , verùm sufficit , si juxta materiæ exigentiam , jam ex uno , & altero , jam ex reliquis petantur . Quod de prioribus quoque praxibus intelligendum est . Unde porrò desumatur rei , de qua agitur , necessitas , utilitas , dignitas , æquitas , & jucunditas , ulterius declarandum restat .

56. Necessitas desumitur 1. ex auctoritatibus divinæ scripturæ , præceptis Dei , & Ecclesiæ , doctrina Christi , & sanctorum Patrum testimoniis . 2. Ex fine creationis , & Religiosæ vocationis , itèm ex obligatione Instituti proprii , ejusque votorum , legum , constitutionumque . 3.

Ex ratione medii, finè quo intentus finis obtineri nequit; quale medium est abnegatio sui, ad ferendam in Religione crucem Christi. 4. Ex debito, quod ex peculiaribus resultat titulis, qualis est v. g. titulus hominis prout ratione præditi, prout Christiani, prout Religiosi, prout Socii Jesu, prout Sacerdotis. 5. Ex causis, & effectibus; itè ex antecedentibus, & consequentibus. &c.

§7. Utilitas desumitur 1. Ex commodis, quæ sequuntur ex tali virtutis actu, vel fuga vitii tam nobis ipsis, quàm aliis, puta: vivis, defunctis æqualibus, superioribus, inferioribus &c. hujusmodi commoda possunt esse tam spiritualia, quàm temporalia; tam hujus vitæ, quàm alterius. 2. Ex sententiis Sacræ Scripturæ & Sanctorum Patrum, commoda rei ad meditandum assumptæ exprimentibus 3. A similitudine, & comparationibus v. g. si pro modico temporali lucello longa via curritur: quantò magis pro æterna beatitudine ad quævis ardua virtutum exercitia connitendum est. 4. Ex consequentibus ab opposito damnis, & incommodis tam spiritualibus, quàm temporalibus. &c.

§8. Æquitas desumitur ex his 1. Quòd talem virtutis actum, aut vitii fugam,

gam, vel inordinatæ passionis repressio-  
nem, svadeat lumen naturale. 2. Quòd  
exigat officium boni Christiani, aut Reli-  
giosi, vel Socii Jesu &c. 3. Quòd idem  
dictet legum æquitas, mens fundatoris,  
exigentia Religiosi statûs, ratio tot bene-  
ficiorum à Deo acceptorum, titulus pro-  
missionis Deo factæ. 4. Quòd idem præ-  
stent alii minoribus longè motivis incita-  
ti, paucioribus mediis, & auxiliis instru-  
cti; neque tot, aut tam grandibus titulis  
obstricti. &c.

59. Dignitas, seu honestas 1. Inclu-  
dit bona exempla, quæ vel Christus, vel  
Beatissima Virgo, vel alii Sancti maximè  
Societatis nostræ, in hac vel illa virtute  
nobis dederunt; per cujus exercitium nos  
quoque conformes erimus Christo, ejus-  
que Sanctis. 2. Includit bona exempla,  
quæ nos per ejusmodi virtutem aliis dare  
possumus, ædificando illos in Domino, &  
juvando ad virtutis amorem. 3. Desu-  
mitur à magna æstimatione, quam con-  
ciliat ejusmodi virtutis studium, aut vi-  
tii fuga, tam apud Deum, & Sanctos in  
cœlis; quàm apud superiores, æquales,  
& inferiores probos in terris. 4. Desu-  
mitur à laude & encomiis, quibus talis  
actus virtutis, aut fuga vitii extollitur à

Scriptura Sacra, aut Sanctis Patribus, vel aliis viris illustribus. &c.

60. Facilitas desumitur 1. Ex spirituali solatio, & lætitia animi, quæ hauritur ex virtutis exercitio, & fuga vitii. 2. Ex amore virtutis, & spe præmii cœlestis inde consecuturi; spes quippe, & amor onus alleviant. 3. Ex assiduo virtutis studio, & exercitatione resistantiam naturæ sensim vincente. 4. Ex unctione gratiæ Cœlestis objectivam virtutis difficultatem emollientis. 5. Ab aliorum exemplis paria, imò adhuc majora, non ex seipsis, sed ex DEI gratia operantium. 6. Ex fiducia, & erectione animæ sese adversus vanas apprehensæ difficultatis opiniones, ab amore proprio ingestas opponentis, plus quippe terrentur homines ab opinionibus, quàm à rebus ipsis &c. Tres hæ praxes facilè cuius efficacia, & proposito meditationis Scopo convenientia suggerent motiva.

## CAPUT VII.

*Præcticus fontium usus nonnullis  
motivorum exemplis illustratur.*

**M**otiva ad religiosam paupertatem. 1.  
An non dignum est, ut membrum  
ca-



Capiti, id est Christo, qui propter nos egenus factus est, conformetur? 2. An non æquum est, ut pro brevi vitæ hujus itinere parvum viaticum præparetur? 3. An non sublime, & gloriosum, id habere sub pedibus, quod mundi reges gerunt in capitibus, aurum scilicet? 4. An non utile, & quæstuosum est, terrena pro cælestibus, temporalia pro æternis, simplum pro centuplo commutare? 5. An non jucundum est, in Sanctæ paupertatis, tanquam matris gremium recipi; ibidemque succisa omnium malorum radice, id est terrenarum opum cupiditate exuta, ab omnibus securum insidiis requiescere? 6. Qui pretiosum thesaurum habet, non patitur in eo vas luteum; absit ergo, ut tu DEum in corde gestans, res vilissimas per terrenorum bonorum amorem immiscere præsumas? 7. Olim Philosophi omnia reliquerunt, ut speculari Cælum possent; & tu Jesu Socie non libenter idem facias, ut cælum obtineas?

62. Motiva ad castitatem. 1. Si juxta commune Philosophorum axioma: expulsio privationis debet præcedere formæ introductionem; quomodo tu introduce-  
re in cor tuum poteris DEum, si prius impurum creaturarum amorem, qui est privatio amoris DEI, non expuleris? quæ

enim est conventio Christi ad Belial? aut  
 quæ participatio iustitiæ cum iniquitate?  
 2. ad Corinth. 6. 1. Arca DEI non ope-  
 rabatur stupenda illa opera, quamdiu ido-  
 lum Dagon in templo stabat; quomodo  
 tu sperare poteris DEUM mira in templo  
 animæ tuæ operaturum, si etiamnum ali-  
 qua creatura, quam velut idolum colis, &  
 amas, in eadem anima tua requiescat. 3.  
 Nè pretiosam vestem inficias, cœnosam  
 viam solerter evitas; cur non majori stu-  
 dio impuritatis cœnum caveas, nè pre-  
 tiosam corporis, & animæ munditiem de-  
 fœdes. 4. Castitas efficit specialiter cor-  
 pora nostra templum Spiritûs Sancti; abes-  
 se ergo debet abominatio desolationis à  
 loco hoc sancto. 5. Crucifixi effigiem lu-  
 tō deturpare non auderes; quantō magis  
 te, qui imago DEI es, obscœna labe pol-  
 luere erubescas? 6. Quid Sanctissima  
 Trinitate majus, & sublimius? sed nihil  
 quoque purius; unde illud Nazianzeni:  
 Prima trias virgo est. 7. Quid DEO-ho-  
 mine excellentius? at nihil quoque casti-  
 us; quid ejus Matre, Nutritio, & Præ-  
 cursorfore Sanctius? verum nihil iisdem eti-  
 am mundius. 8. Quanta est Angelorum  
 pulchritudo, & Martyrum gloria? at Ca-  
 stitas, Ambrosio teste, non solum Martyres  
 facit, sed etiam Angelis æquales reddit;  
 omnis

omnis itaque ponderatio non est digna continentis animæ. Eccli. 26.

63. Motiva ad obedientiam. 1. Si religiosus status est congregatio eorum, qui ad perfectionem tendunt sub certis legibus, statutis, & uno capite; potestne aliquid magis necessarium ad ejus tam erectionem, quàm conservationem esse, aut excogitari, quàm obedientia? sinè hac enim, si quisque in Religiosa familia id ageret, quod luberet; quis, obsecro, horror, quæ perturbatio, quæ dissensiones orirentur? nec amplius religio cum veritate dici, & esse posset. 2. Si autem in omnibus religiosis ordinibus necessaria adeò est obedientia, quantò amplius in Societate Jesu, quæ ex tam diversis in unum coalescit nationibus, tam varios gradus, & officia in se complectitur; cujus vocationis est diversa loca peragrarè, & vitam agere in quavis mundi plaga, ubi majus DEI obsequium, & animarum salus speratur. Quì hoc sinè excellenti obedientia fieri poterit? Ecce DEUS-homo non solum Matri suæ, & S. Josepho, sed etiam profano Augusti edicto, imò iniquissimis quoque judicibus, & sacrilegis carnificibus sponte sua paruit; & tu vilis homuncio adhuc putas esse arduum hominibus te subicere. 4. Si in omnibus actionibus

appareret Angelus , & quid , ac quomodo agendum , aut omittendum fit , dictaret , quàm felicem te putares ? atqui certior es de voluntate DEI , si Superior præcipiat ; cur ergo non beatum te censes , quòd eum sequi , & audire queas ? §. Sola obedientiæ via , sicut à iudicio proprio , & voluntate propria est remotissima , ità nullis errorum ambagibus est obnoxia ; unde certa prædestinationis est nota juxta illud Christi : Si vis ad vitam ingredi serva mandata. Matth. 19. 6. Si viatori in itinere periculoso se offerret comes errare nescius , an non promptè ei se adjungeret , ac pareret ? cur ergo non & tu obedientiam fallere nesciam , pro duce itineris ad perfectionem , & cælum assumis ?

64. Motiva ad excitandum spiritûs fervorem. 1. Avarus nihil relinquit , quod non cupiat , cùm tamen desideria tantùm serviant majori torturæ , quid faceret , si simul , ac concupisceret , res quoque possideret ? sicut tu facere potes : an multum à te petitur , si exigatur , ut pessimus , id est avaros imitando optimus fias ? 2. Si mendicoi per unum diem facultas daretur ex Rego thesauro , quantum vellet , & posset , auferendi ; an putas unicò momentò ori aturum ? cur ergo tu tam tepidè te geris in immortalibus divitiis hoc brevi spatio

tio vitæ congregandis? 3. Natura semper conatur meliori modo, quo potest, opera sua facere: an gratia in te non poterit, quod natura suis viribus potest? 4. In omnibus aliis rebus optima vis habere; cur non ergo & vitam, & opera optima? cur in pecunia, & mercibus emendis non vis decipi, & in te ipso, ac vita tua affectas illudi? 5. Si tua salus, & omnium hominum à quovis opere tuo penderet, numquid summam in eo perfectè absolvendo industriam adhiberes? cum ergo nunc à quovis opere tuo pendeat gloria DEI, quæ pluris facienda est, quàm tua, omniumque salus hominum, nunquid oscitanter illud exequi audebis?

65. Motiva ad patientiam. 1. Christus in tui fanitatem totum passionis calicem exhaust; cur tu aliquot saltèm guttulas ad ejus gloriam gustare renuas? 2. Si Angelus nuntiaret esse divinam voluntatem, ut hanc, vel illam adversitatem patiaris, an non libenter eam sufferres? atqui certior est fides, quàm si Angelus de cælo nuntiaret; cur ergo patienter adversa excipere recusas? 3. Solantur se alii in doloribus, si homines passionis socios habeant; cur solatium tu non haurias, quando passionis Socium te habere DEum vides? 4. Si particulam materialis cru-



cis Christi ab aliquo donatam, non finè gaudio singulari acciperes; cur spiritualis crucis partem, quæ longè præstantior est, cum tristitia, & odio acceptes? 5. Nunquid credis mysterium Trinitatis, quia Christus revelavit? crede ergo tribulationes quoque bonas esse, quia illas Christus beatitudines vocavit. Si autem bonas esse credis, cur illas ut tales ferre renuis? 6. Quidquid pateris, nihil est in comparatione mali, quod commisisti; in comparatione boni, quod amisisti; in comparatione pœnæ, quam meruisti, in comparatione cælestis gloriæ, quam in retributionem sustinentiæ consequeris.

66. Motiva ad continuum mortificationis studium. 1. Miles stat accinctus armis semper, si est inter hostes semper. Et tu es: foris enim pugnæ, intus timores, habes latentes domi hostes continuos, nempe rebellantes jugiter passionem tuas; mortificationis ergo armis incessanter utere. 2. JESU conformem esse, tibi ejusdem socio nunquid convenit? at tota ejus vita crux erat continua; unde Marc. 10. dixit: Potestis bibere calicem, quem ego bibo, ponens in præsentem, quod semper calicem passionis biberit, etiam ante passionem. 3. Qui continuum pœnæ æternæ meruit; quid magnum, si continuum

pœnæ

pœnæ temporanæ ultro ferat? 4. Qui continuum gloriæ æternæ sperat, ad quam non sunt dignæ passionēs hujus temporis; quid magnum reputet, si continuo exhibeat, quod non est condignum, sed leve tribulationis? 5. Punias in te ipse, nè puniat DEUS; nam inquantum non perceris tibi, parcat DEUS. 6. Si continuo tibi cum hoste luctandum esset, numquid enervare illum semper studeres; cur non ergo carnem semper atteras, cum qua perpetuum animæ tuæ duellum est?

67. Motiva ad contemptum mundi. 1. Nolite diligere mundum, neque ea, quæ in mundo sunt. 1. Joann. 2. 2. Christus omnia mundo contraria elegit; aut ergo mundus errat, aut Christus fallitur; atqui hunc, cum infinita sit sapientia, falli impossibile est; ergo mundum errare necesse est. S. Bernardus. 3. Si bonus esset mundus, adhuc tamen stultè præponeretur DEO, in quo est omne bonum; quanto stultius præponetur illi: cum totus adeo sit in maligno positus. 4. Si modicum fermenti totam massam corrumpit, quid illi sanum inerit, qui mundo miscetur, ubi & fermentum, & massa tota corrupta est? 5. Quemadmodum mundo mortuus es, dum è mundo egressus es; ita DEO morieris, si ad mundum redieris: fiēsque arbor  
bis

bis mortua, & infructuosa, nec mundanæ vitæ fructibus, nec religiosæ gaudens. 6. Si mundus iis, qui fideliter ei serviunt, tam fallax & perfidus est, qualis tibi futurus esset, si postquam defecisti à mundo, deficeres quoque à DEo, infidelis utrique? an non te mundus, ut desertorem sui persequeretur; DEus verò tanquam perfidum castigaret.

## CAPUT VIII.

*De diversis meditantium statibus,  
qui communiter exercitio orationis  
occurrere solent.*

68. **A**D plenitudinem doctrinæ hætenus traditæ, valde necessarium est Tyronibus, diversos exponere status, in quibus meditates versari possint; simulque explicare, quomodo in singulis se habere debeant; sinè hac quippe directione frustraneus esset omnis meditandi labor; & mille illusionibus expositus; cum oppositarum in animo commotionum orationis mentalis, uti & quælibet ferè alia spirituum rerum tractatio, sit feracissima.

69. Status porro hujusmodi sunt inter se multum differentes: quandoque enim experitur quis, magnam in orando facilitat-

litatem, & animi promptitudinem; aliàs  
 ficcum adeò, ac sterilem se advertit, ut nè  
 quidem materiam adoriri, aut ullum bo-  
 num affectum formare possit. Uno die  
 quis persentiscit fervorem, altero langvo-  
 rem; uno magna perfruitur quiete, ac  
 mentis attentione, altero millenis turba-  
 bitur distractionibus. Erit cùm magnà  
 quis affluet devotionis abundantia, &  
 consolationibus, mox molestissima aridi-  
 tate, & desolationibus affligetur: imò  
 quandoque à gravissimis impugnabitur  
 tentationibus. Hoc plurimùm affligit  
 Novitios, qui hujusmodi molestiis inque-  
 ti, & pusillanimes redduntur; sensibili-  
 bus è contrà solatiis nimis adhærere scunt;  
 iisque ad nutriendum nonnisi amorem  
 suum proprium utuntur.

76. Quæres: undenam hujusmodi mu-  
 tationes proveniant? R. Illas quandoque  
 provenire à DEO, interdum à nobismetip-  
 sis, aliquando à dæmone; nunquam enim  
 orationi vacamus, quin non hi tres ad  
 eam concurrant: DEUS principaliter a-  
 gendo, homo cooperando, dæmon impe-  
 diendo. DEUS tanquam principalis di-  
 rector orationis, aliquando hominem, per  
 viam ducit sensibilis devotionis, & con-  
 solationum; subindè per viam ariditatis,  
 & desolationum. Anima quoque homi-  
 nis

nis ex parte sua agit, divinæ directioni co-  
operando ; verùm sicut illa corpori mul-  
tis vicissitudinibus subiecto est affixa , à  
quo etiam in operando dependet ; ità  
quandoque facilitatem , interdum diffi-  
cultatem, & fastidium experitur, ac proin-  
de frustrà homo. caput suum obtunderet,  
qui æquali semper passu procedere nitere-  
tur, juxta illud sapientis: corpus, quod cor-  
rumpitur, aggravat animam , & terrena  
habitatio deprimit sensum multa cogi-  
tantem.

71. Dæmon etiam suis non deest par-  
tibus , hominémque , ab oratione, quan-  
tùm potest, avertit. Quod triplici præstat  
insultu : 1. Meditationem persuadere ni-  
titur rem esse , vel omnino impossibilem,  
vel verò esse purum DEI donum , omnem  
excludens humanam industriam. 2. Cùm  
meditationem non potest, saltèm ejus suc-  
cessum præpedire studet , suggerendo im-  
pertinentes , vanas , ac pravas cogitatio-  
nes ; commovendo humores corporis, ut  
magnas quis sentiat gravedines , tædia , &  
dolores ; excitando molestissimas tenta-  
tiones contra puritatem , contra fidem,  
contra DEUM. Cæterùm interiores ani-  
mæ recessus penetrare nequit , sed totus  
ejus conatus hæret in imaginatione , &  
sensibus, quarum commotionum, ac ten-



tionum non nocet sensus, si absit consensus. 3. Excitat interdum illuminationes fallaces in imaginatione, & sensibilia quædam gaudia in appetitu sensitivo, curâtque subtiliter, ut hæc illustrationes, & gaudia desinant in elationem animi, sensuum libertatem, aliâque non levia vitia.

72. Quæres 2. Quid agendum, ubi quis in meditatione molestis impetitur tentationibus? R. Modum resistendi illis non debere necessario esse tam efficacem, ac ferventem, ut ei statim cedat, & abscedat tentatio: non enim, ut prius diximus, nocet sensus, ubi deest consensus, sed sufficere, si hæc præstes. 1. Ut ante omnia tentationes ejusmodi tibi displiciant, cujus displicentiæ hæc certa erunt signa, nempe: si molestæ tibi illæ accidant, si nolles eas pati, & sentire; vel si cupias meditationem à tentationibus vacuam habere. 2. Omnia hæc sola duntaxat mente sentire sufficit, ideo opus non est ad negandum tentationibus consensum, aut dicere: nolo, aut iis capite abnuere, vel alio corporis motu displicentiam ostendere; si hoc pacto te gesseris, non fatigabis caput, sicut non foret opus fatigare caput ad fugandas tenebras è cubiculo, si nolente, & invito te extinctâ candelâ cubiculum tu-

um occuparent ; sed satis esset , si ex tibi displicerent , lucemque optares suo tempore.

73. In casu occurrentium quarumcunque tentationum de hoc Novitios singulariter monitos velim , ut hilaritatem potius mentis , quàm angorem assumant , talis enim tristitia , timor , & anxietas multum obest , novæque tentationi vires supeditat. Ratio est : quia juxta communem Philosophorum doctrinam , timor naturaliter phantasiâ movet , atque si hæc multum circa rem quampiam occupetur , fortius illam , tenaciùsque memoriæ imprimat , unde tentatio postea longè vivacior evadit. Quod in trabe non admodum lata videri potest , quæ si humi jaceat , ludibundus quis eam transit ; si autem super fluvium præterlabentem , aut elevationi quopiam in loco collocetur , non sinè ingenti metu , & horrore calcabitur : quia scilicet timor , plerumque sanguinem introrsum vocat , sicque efficit , ut exterioribus membris suo vigore destitutis , non sinè periculo , & horrore quis incedat. Unde ad vincendas faciliè tentationes utilis , ac necessaria est lætitia spiritalis , anxietatem mentis excludens.

74. Quæres 3. Quid faciendum , ubi quis magnam persentiscit repugnantiam,

de tedium ad orationem? R. Magnâ opus  
 esse in semetipso vincendo curâ , & fide-  
 litate, nè unquam ab oratione se subducatur,  
 aut suo in illa muneri deficiat: quia repu-  
 gnantia illa est manifesta dæmonis ten-  
 tatio. Unde si in tali casu nihil aliud fa-  
 cere posset , quàm quòd statuae instar ge-  
 nuflexus persistens diceret: Domine pro-  
 pter te, & tui amorem hic maneo, mul-  
 tùm foret. Connitendum interea est, ut  
 in tali statu subindè eliciat internos actus  
 adorationis, resignationis, oblationis, a-  
 liosque similes; tametsi verò id fieri vide-  
 atur sinè ullo gustu, nihilominus actus illi  
 DEO erunt acceptissimi, & pro orantis a-  
 nima meritorii; unde uberiorem quis ex  
 hujusmodi victoria sui sperare protest fru-  
 ctum, quàm si magna potitus fuisset faci-  
 litate, & tranquillitate.

75. Quæres 4. Quid agendum , ubi  
 quis in oratione notabilem capitis dolo-  
 rem, aut virium debilitatem experitur?  
 R. Cavendum esse in simili casu, nè quis  
 violenter hoc malum superare velit, quin  
 potius è contrario valde suaviter illi pro-  
 cedendum erit, & exigua cum activitate,  
 & potentiarum leni applicatione orationi  
 insistendum erit. Hinc loquendo univer-  
 sim, dico sufficere pro tali, si absque ulla  
 contentione capitis, & pectoris, cogitet  
 sua-

ſvaviter de re aliqua pia, in punctis meditationis contenta; eo modo veluti illa repræſentando, quo ſolemus aſpicere aliquam imaginem piam, quo aſpectu non fatigatur caput, & interim pius aliquis excitatur in anima affectus vitandi aliquam imperfectionem, aut faciendi aliquod opus bonum, vel in eo perſeverandi; cæterum humiliter, & cum plena in DEum reſignatione hoc malum perferri debet; ſufficiensque hoc pacto fructus exinde referetur.

76. Quæres ſ. Quotnam ſint ſtatus, & qui, per quos communiter Deus in orationis exercitio ducit? R. Triplicem eſſe ſtatum, quorum *primus* eſt ſtatus communis, & ordinarius veræ, & ſubſtantialis devotionis, qui nec abundat ſenſibili ſvavitate, & conſolationibus, nec laborat ariditate, & deſolationibus, ſed inter hæc extrema conſiſtit medius. *Secundus* eſt ſtatus ſenſibilis devotionis, in quo tanta hominem piorum affectuum ſvavitas, & dulcedo afficit, ut ea nequaquam in ſuperiori ejus parte ſe contineat, ſed per redundantiam, in partem quoque inferiorem, ac ſenſitivam ſe transfundat, ejusque ſenſus externos juncundè & perceptibiliter penetret. *Tertius* è diametro oppoſitus, eſt ſtatus ariditatis, & deſolationis.

tionis, molestus quidem, ac difficilis, verum excellentissimus, & maximè meritorius; quibus DEus animas fideiiores exercet. Hos status diversos distinctis capitibus exponemus.

77. Pro tribus hisce statibus magnæ necessitatis, & utilitatis documentum fideliter observandum accipe. In cuiusvis meditationis tuæ principio ità comparatus esto, ut plenissimam in omne Dei beneplacitum resignationem, & indifferentiam habeas, sive is velit te ducere per lumen, seu per tenebras, sive per solatia, & gustus sensibiles, seu per ariditates, & desolationes. Quæcunque enim DEus facit, non possunt non esse tibi quàm maximè proficua, totumque in eo situm est, ut omnia de manu DEI æquo suscipias animo. Et verò quid refert, quâ viâ ad eum venias, modò illuc pertingas? constanti igitur resolutione opus est ad acceptandum cum indifferentia statum quemcunque ex tribus allegatis: neque enim orationis exercitio vacare debes pro tua oblectatione, sed ut DEo placeas: si autem magis illi places in tua siccitate, quàm abundantia; in ariditatibus, quàm suavitatibus; quis es tu, qui objectum delectationis illius mutare velis?



✻ ) 68 ( ✻  
CAPUT IX.

*De statu ordinariæ devotionis inter solatia sensibilia, & desolationes medio.*

78. **D**Evotio vera, ac substantialis, nihil est aliud, quàm voluntas prompta & resoluta ad faciendum, quidquid spectat ad servitium Dei. Hæc autem devotio, seu voluntatis promptitudo, potest esse in anima hominis, vel cum voluptate, & oblectatione sensibili; vel cum ariditate, & desolationibus, vel demum absque utrisque his extremis; quod tunc contingit, quando DEUS homini gratiam tribuit nonnisi ordinariam, quæ est imperceptibilis, sicque permittit, ut ipse laboret, applicando industriam, traditæque meditationis praxi utendo. Qua in re plurimum oblectatur Majestas Divina, ubi videt nos sollicitè curantes, ut penitentiorem ejus cognitionem, ferventiorémque amorem consequamur; qui labor nobis est valde utilis & meritorius.

79. Ea propter magnò animò debes hunc statum suscipere, & in eo absque omni fastidio, aut viæ alterius desiderio permanere, imò statum hunc magni facere, reliquisque præferre debes: DEUS enim est, qui illum tibi decernit, tantumquam

quam sufficientem , aptumque , quo mediante adæquatum meditationis finem , & fructum consequaris. Via hæc est valde consentanea naturæ humanæ : quia ratio illic agit ; nec admodum difficilis est : quia gratia Dei ordinaria nobiscum operatur , etsi illam sensibilibiter non advertamus ; id quod Novitii bene debent advertere , nè incidant in errorem eorum , qui nunquam oratione sua contenti sunt nisi sensibilem in ea consolationem experiantur , quæ communiter non servit iis , nisi ad deliniendam blanditiis eorum naturam , amorémque proprium fovendum.

80. Hic igitur status est inter consolationes , & desolationes medius , in quo mens hominis ordinariis suis functionibus relinquitur , nihil hinc turbante ariditate , nihil illinc provocante sensibili solatio. Hujusmodi quies , ac tranquillitas instar sanitatis naturalis est , ubi magna temporis ratio habenda est , ut fructuosè collocetur , tanquam acceptabile tempus , & dies salutis. Strenuè itaque hac in via laborandum est , excitando intellectum ad inquirenda convenientia motiva , quibus inflammetur voluntas , hanc deinde flammam nutriendo , & affectuum materiæ conformium productione augendo , denique traditam hætenus meditandi normam in praxim redigendo.

31. Quæres 1. Cuinam incommodo status iste sit obnoxius, contra quod hac via incedentes se munire debent? R. Statum hunc distractionibus esse obnoxium, contra quas ordinariè conqueruntur ii, qui hac via procedunt. Distractiones porro huiusmodi, aliquando eos ex improviso, ac inadvertentes occupant, sensimque à proposito divertunt. Aliquando advertenter iis cedunt ipsi, licet quasi inviti, ob nimiam eorum importunitatem. Quandoque ex culpabili ignavia iisdem locum præbent. Quæ autem sint causæ ac radices distractionum, quæve remedia adversus illas usurpando, in sequentibus dicemus quæstionibus.

32. Quæres 2. Quænam sint causæ distractionum? R. Esse sequentes. 1. Est fragilitas, & inconstantia humani intellectus. 2. Dæmonis fraus, & malitia. 3. Multitudo vanorum desideriorum, affectuumque inordinatorum. 4. Incustodia sensuum exteriorum, tam ante, quam in meditatione. 5. Negligens phantasie, triumque potentiarum ad evagandum pronarum recollectio, & ad meditandum applicatio. 6. Omissio præviæ dispositionis debitæque præparationis superius Numero 10. descriptæ. 7. Immoderata rerum agendarum, aut futuro-  
rum

iisq  
à Di  
nis  
ora  
finc  
neq  
dem  
ne p  
exer  
tior  
ficul  
forti  
incl  
tion  
sever  
trista  
cont

86. I  
lunta  
sistens  
rum  
rumq  
etam  
quam

isque, voluntariè non inharendi gratiam à DEO postulent, ac materiam meditationis resumant. Magnus quippe fructus orationis censendus est, quòd quis in ea ad finem usque perducenda fidelis persistat, neque tædio, aut impatientiâ victus eandem derelinquat; in tali namque oratione præter actus patientiæ, & humilitatis, exercetur actus Religionis, tantò præstantior, quantò plures in eo exercendo difficultates vincuntur. Itèm actus heroicæ fortitudinis, & constantiæ, dum propriæ inclinationi tam fortiter resistit, & in oratione non obstantibus distractionibus perseverat. Hinc gaudendum potiùs, quàm tristandum est ob importunas ejusmodi contra voluntatem incidentias.

## CAPUT X.

### *De statu devotionis sensibilis.*

86. **D**Evotio vera, & substantialis in promptitudine, & efficacia voluntatis ad præstanda DEI obsequia consistens, tantam subindè extraordinariorum mentis illustrationum, suavissimorumque voluntatis affectuum sibi conjunctam habet abundantiam, ut ea nequaquam in superiori hominis parte se contineat,

neat, sed in inferiorum quoque, & sensitivam diffundat,, omnesque sensus externos jucundè, & perceptibiliter irriget, ac penetret; ità ut eor hominis inardescat, vultus inflammetur, membræque omnia singulari quadam agilitate afficiantur. Hunc statum esse dicimus devotionis extraordinariæ, & sensibilis, in quo nè Tirones errent, plenam iis instructionem, & doctrinam, non minùs utilem, quàm necessariam per varias quæstiones subiiciemus.

87. Quæres 1. Undenam proveniat svavitas, & dulcedo sensibilis? R. Apud Tirones provenire ex sequentibus. 1. Communiter ex DEI benignitate, volentis recter ad se conversos attrahere, quos non solùm orantes, sed etiam subindè aliis intentos occupationibus repentè tangit, & indicibili interiùs svavitate replet; tum ut iis voluptatum sæculi nauseam, & fastidium inducat; tum ut ad exercitium orationis svaviter pelliciat; tum ut eodem in suo servitio immobiles efficiat. 2. Interdum ex devotionis internæ notabili redundantia corpus post se trahente, & ad spiritualia elevante. 3. Nonnunquam ex rerum spiritualium, quas meditantur, & nunquam antè consideraverant, novitate. 4. Ex teneritudine indolis, & natu-

ræ facilioris mollitie ad recipiendas quorumlibet objectorum impressiones apta, ac disposita.

88. Quæres 2. An sensibiles hujusmodi consolationes etiam dæmon imitari, atque excitare possit in homine? R. Eum posse non solum jucundas phantasie representationes proponendo, ut egregias ei veritates aperiat, sed etiam commotis nonnihil corporis humoribus titillando sensus, eosque lætitiâ afficiendo. Cujus finis, ac intentio est, ut anima tali oblectationi immorans, illaque se, magna quasi voluptate nutriendus, incidat in gulam spiritualem, crassamque sui ipsius complacentiam, ex qua nonnunquam sequuntur graves capitis dolores, qui hominem pro tempore non modico ineptum reddunt ad orandum. Hinc fit, rem esse magni momenti, ut quoad hos gustus, undecunque tandem illi proveniant, semper quis consulat suum in spiritu Magistrum, & Directorem, ubi primùm eos adverterit. Præsentem enim consolatione sensibili imperare sibi nequit juvenus, quæ aliunde semper ad extrema vergit, & vires suas, ex rerum delectatione metitur.

89. Quæres 3. Quænam sint indicia, ex quibus dignosci queat, quis devotionis gustus, & consolatio sensibilis sit à



DEO, quis autem à dæmone? R. Veros devotionis gustus, & consolationes ab adulterinis ex hisce discerni signis. 1. Vera consolatio sensibilis non est vehemens, aut impetuosa, sed tranquilla, lenis, & pacata. 2. Carnem non titillat, sed inordinatos ejus motus compescit, & mitigat. 3. Mentem accendit, & illustrat, non tamen extollit, & inflat. 4. Obedientia opera arbitrariis, communia privatis, præscripta spontaneis anteponebat. 3. In parendo cæcam voluntatis, ac judicii subjectionem inducit. 6. Non utitur oratione tanquam fine, sed eam velut medium ordinat, ad fidelem legum Divinarum, suique Instituti adimplerionem. 7. Impellit hominem ad exactam minimorum curam, profundam animi humiliationem, sanctum sui ipsius odium, & actuosum DEI amorem.

90. Quæres 4. Quomodo in veræ devotionis sensibilis gustu se Novitius habere debeat? R. Sequentia, nè erret, observanda esse. 1. Cor suum magna cum humilitate, & reverentia ad hujusmodi gustus recipiendos aperire debet; merum in iis Dei donum agnoscendo, nec quidquam suis meritis, præparationi, aut fidelitati attribuendo. 2. Ità eorum impulsibus parebit, ut opera ex Regulis præscripta, arbi-

arbitrariis, debita spontaneis, communia privatis non postponat. 3. Curabit, nè in iis tanquam sine otiosus conquiescat, sed utatur iis tanquam efficacibus mediis à DEO datis ad extirpanda vitia, & exercendas virtutes. 4. Cavebit sedulò, nè vota, promissiones, & indiscreta rerum extraordinariarum proposita statuatur v. g. humi deinceps semper cubandi. 5. Vitabit ex una parte nimiam potentiarum activitatem, pectorisque, ac capitis contentionem, ex altera parte otium, socordiam, & quietem; in quorum medio tutissimus ibit. 6. Meminisse debet, quàm ignavus, & pusillanimis sit ingruente desolatione, nè in complacentiam vanam incidat, quæ consolationes plerumque sequi solet.

91. Qui naturæ sunt tenerioris, ac sensibilibioris hac via debent cum magna circumspeditione, & cautela procedere, dumque sui in spiritu Magistri singulariter sequi; alioquin timendum est, nè, sicut ordinariè sunt sui ipsorum amantiores, imaginationisque vivacioris, ac genii inconstantis, & inæqualis; ità in molestos incidant casus. Etenim totos se huic svavitatis oceano immergent, magnosque DEI amicos se reputabant, & nonnunquam sibi imaginabuntur ea sen-

tiri, & gustari à se, quæ nec sentiuntur, nec gustantur. Ratio hujusmodi illusionum est: quia has consolationes sensibiles non recipiunt cum discretione, judicio, & Spiritu DEI, sed juxta genium suum, qui in ipsis multum inæqualis, & inconstans est; hinc sæpe ex uno extremo, exerrant in aliud, suntque durante sensibilis dulcedinis gustu supra modum devoti, ferventes, mortificati, modesti &c. mox recedente consolatione, emancipati, leves, curiosi, insolentes, &c.

92. Veræ porrò consolationes sensibiles quemadmodum non sunt despiciendæ, quoniam & à DEO donantur, & à peccatis, atque imperfectionibus incipientes abducunt, eorūque actiones aliquantū perficiunt, ac facilitatem in obsequium DEI inducunt; ita quoque non sunt supra modum æstimandæ. Tum quia non sunt necessarij solidarum virtutum effectus; tum quia non sunt necessaria profectus spiritualis instrumenta, sine quibus plurimi magnam virtutem, & mentis puritatem consequuntur. Quòd si recesserint tales spirituales gustus, nemo tristetur, aut turbetur, nihil quippe ab eo tollitur necessarium ad spiritualium profectum; si verò consolationes sensibiles

les affluant, nemo propter eas meliorem se existimet, nec alios eas non habentes contemnat, aut suam in iis virtutem constituat.

93. Ex his inferant Tirones, pro Sacramento pœnitentiæ non requiri dolorem sensibilem, id est talem, qui cum experimentalis motione cordis eliciatur, sed sufficere dolorem purè spiritualem, seu rationalem, qui in sola præcisè interna animæ displicentia, & efficaci odio peccati consistit. Nam, sicut consolationes sensibiles non sunt in potestate hominis, neque in illis solida virtus, ac devotio substantialis necessariò consistit: ità nec talis dolor sensibilis est in libera potestate hominis, nec in eo sita est vera, ac solida detestatio, & odium peccati, adeoque non requiritur necessariò ad confessionem, quod ad tollendos plurium scrupulos scire juvabit.

## CAPUT XI.

### *De Statu ariditatis, & desolationis.*

94. **S**Tatus ariditatis, & desolationis est ille, in quo anima sterilitate discursuum piorum, & inopiâ affectuum bo-

norum, nec non fastidio interdum, ac lassitudine adeò afficitur, ut propositam meditationis materiàm exordiri, aut proficui nequeat, quacunque ex parte illam respiciat. Quæ si in superiore duntaxat hominis parte se contineat, ariditatis nomine exprimuntur; si autem ad sensitivam hominis partem descendant, nomen desolationis fortiuntur. Nos in sequentibus communiter ariditatis nomine utemur, ità tamen, ut, quæ de illa dicturi sumus, de desolatione quoque intelligenda simul velimus.

95. Tirones in hoc statu constituti multum conturbantur, speciatim in principio suæ conversionis, ubi nonnunquam supra modum, & inconsolabiliter affliguntur, cunctaque inclinata, & desperata existimant, atque à DEO se credunt odio haberi, ab ejusque conspectu arceri. Huic afflictioni major accedit amaritudo, dum ad præteritas se reflectunt delicias, & consolationes, quando scilicet montes eis stillabant dulcedinem, & colles lac, & mel profundebant. Tunc præ sensibili amaritudine cordis gemunt, lachrymisque nonnunquam infelicem hujusmodi statum deplorant. Exponemus itaque causas, & remedia ariditatis; itèm quo pacto in iis Tirones se habere debeant, & an cum ea medi.

ditatio bona , & fructuosa consistere queat.

96. Atque ut ab ultimo initium sumam, dico cum statu ariditatis posse consistere bonam, & fructuosam orationem. Ratio est: quia ultimus meditationis finis, ad quem omnes tres fructus numerò tertio præmissi referuntur, est sanctitatis consecutio, ac perfecta voluntatis nostræ cum divina conformatio; si ergo ariditatem patienter, & cum resignatione ad voluntatem DEI acceptemus, fructum orationis bonæ consequimur. Plus est, & multis solatiofum, quod addo: accidit non rarò, ut in statu ariditatis faciliùs quis assequatur finem, ac fructum, quem oratio intendit, quàm in statu sensibilis devotionis. Ratio est: quia potentia DEI non reducitur ad unicam tantum viam, aut unum præcisè modum perducendi nostras animas ad intimum amoris cum bonitate sua Divina unionem; hinc ubi se nobis in uno statu subtrahit, in altero abundanter communicat, atque ubi nos videtur deserere, nos maximè sustinet, & in nobis modo quidem imperceptibili quoad sensum, reali tamen, ac vero, operatur illas gratias, quas in statu devotionis sensibilis obtinuissimus; imò quandoque longè ampliores, ut ex sequenti numero patebit.



97. Nihil proinde servitia DEO exhibita in statu ariditatis de suo valore amittunt, imò propter victoriæ vim fiunt gratiora, & ampliori mercede digna; tum quia sunt magis ardua, quàm devotionis sensibilis obsequia; tum quia synceriora, & igne adversitatum probata, & solidum affectum erga Deum testificantia. Ex his patet vulgaris Tironum error, quo sibi plures persvadent, nihil bene fieri, nisi ab animo sensibilibiter alacri, & cum experimentalis mentis gustu peragatur. Cùm tamen plures Sanctitatis famâ illustres extiterint, qui continuis multorum annorum ariditatibus subjecti, nihil interim de operum suorum valore, merito, & perfectione amiserint. Sic S. Franciscus Seraphicus bienniô, S. Theresia annis octodecim, P. Balthazar Alvarez annis sedecim molestissimas sunt passi ariditates.

98. Causæ ariditatis cum suis remediis sunt hæc. 1. Est nimia sensuum libertas, & indulgentia, jure enim merito recedit à nobis Spiritus Sanctus, quando cor nostrum in res creatas, & externas inordinatè effundimus. Cui pro remedio opponenda est fidelis custodia cordis, per assiduam sensuum tam externorum, quàm internorum continentiam. 2. Est nimia sollicitudo, & cura circa res exteriores, quæ

quæ nobis agendæ incumbunt, tametsi ex officio, & obedientia sint præscriptæ: cor enim nostrum facilius recipit impressionem illius, quod amat, ac de quo anxie sollicitum est; talis autem impressio multum obstat receptioni motionis Divinæ. Pro remedio serviet, si naturalem agendi stimulum, & ardorem temperemus, neque ulli officio, functioni, aut operi immoderatè adhæreamus, orationemque summi momenti rem esse ducamus, cui sub præscriptam ad meditandum horam, nullum aliud magis dignum, necessariûmque negotium præponi possit. Sic P. Franciscus Suarez maluit totam suam scientiam amittere, quàm unam meditationis horam negligere. 3. Est revolutio humorum corporis, sive ex naturalibus indispositionibus orta, sive ex aëris, vel temporis mutatione, aut aliis occasionibus excitata. Hoc in casu aliud remedium non est, quàm ut cum humilitate, patientiâ, & resignatione hanc molestiam feramus.

99. Quisquis ariditatem experitur, neque tamen aliquam ex prædictis causis deprehendit, sibi persvadeat, Deum esse, qui illam immittit, ob finem aliquem particularem, sive ut ipsius probet fidelitatem in orando, sive ut ipsum doceat sibi  
fer-

fervire nuda fide, & puro corde, non, quæ sua sunt, quærente, sive ut hac via illi commonstret devotionem sensibilem, orationisque gustum, ac dulcedinem non ab ipsius pendere industria, aut potestate. His autem in casibus non ampliùs vocatur propriè ariditas, sed derelictio DEI, sicut dereliquit Salvatorem nostrum in cruce. Derelictio talis est duplex, alia negativa, alia positiva. Prior nihil est aliud, quàm impotentia quædam agendi, quæ facit, ut propositam materiam quis ordiri nequeat, quomodocunque illam aggrediatur, ità ut præter vires passivas, nullis ferè aliis uti possit, ac si anima in corpore extincta foret. Positiva est, quæ animum hominis in magnam conjicit tristitiam, ac penè desperationem, hinc initium sumunt ordinariè rigores illi, & exteriores expoliationes, atque omnis activitatis suppressiones, & aliæ excellentes viæ, quibus DEUS animas fideliores exercet, atque ipsarum esse destructio, suum in ipsis constituit, ac stabilit. Verùm hæc non sunt pro Tironibus.

100. Superest modum procedendi Tironibus ostendere in statu ariditatis, sive hæc oriatur à DEO, sive ex culpa ipsorum. Si igitur tempore meditationis ariditas duret, nec ulla cogitatio pia, aut affectus

bo-

bonus Novitio occurrat, hoc pacto se gerat. 1. Firmiter credat hunc molestiæ ac tolerantiae statum esse à DEO, non minùs quàm statum svavitatis, sive illum defectibus suis ipse provocaverit; sive DEus ex providentia sua eundem ordinârit; juxta illud Psal. 78. Tuus est dies, & tua est nox. 2. Humiliet se coram Deo, & agnoscat, quòd indignus sit, qui cum gustu, & dulcedine oret; quòdque ob peccata sua dignus sit, qui hac ariditate & molestiâ puniatur. 3. Agat DEO gratias, quòd hac ratione humiliet, & puniat peccata sua, ut minùs habeat, quòd in altera vita poënis afficiat. 4. Roget DEum, si ad majorem ejus sit gloriam, ut illam ariditatem à se auferat. 5. Si carere ejusmodi desolatione non est ad gloriam Dei, offerat se ad supportandam illam totâ vitâ, dummodo efficacem DEus gratiam tribuat, ut illam sinè peccato ullo, sed potiùs cum gustu, & satisfactione DEI perferre queat.

101. Cavendum solerter, nè quis in hoc statu positus, aquam de petra, oleùmque de saxo durissimo elicere violenter attentet. Hoc est, ut nolit per vim haurire bonas cogitationes, aut ex fundo hoc sterili educere pios affectus; id enim qui conniteretur, frustrâ sibi caput ob-

tunderet, quia DEUS hujusmodi cogitationes, & affectus hoc in statu concedere renuit, quin potius vult, ut pro tunc anima maneat illis omnino orbata. Cum humilitate igitur, patientia, & resignatione status iste cum suis oneribus, & molestiis ferendus est, non minùs enim Christus illum tum in monte Oliveti, tum in Cruce per derelictionem suam consecravit; quàm statum consolationis in monte Thabor sua transfiguratione sanctificaverit. Æqualiter itaque utrumque hunc statum genuini æmulatores & Socii JESU amplecti debent, persuasum sibi habentes, res suas utrobique prospere succeduras, si fideles DEO fuerint, ejùsque sanctissimo beneplacito se in omnibus conformaverint.

## CAPUT XII.

*De internis animi impulsibus, & inspirationibus tam intra, quàm extra orationem occurrentibus.*

102. **N**ON omnem motum internum, & inspirationem à DEO esse, sed aliunde etiam à spiritu suspecto & sinistro oriri posse, extra dubium est; unde monet Apost. 1. Joann. 2. Nolite omni Spiritui

ritui credere, sed probate Spiritus, si ex DEO sint. Nè proinde erroris, vel imposturæ spiritualis periculo exponantur Novitii, cautè, prudenter, & circumspèctè, ab iis interim motus, & inspirationes bonæ, ac sinceræ, à suspectis discernendæ erunt, juxta Regulas S. P. N. de discretionè spirituum datas. Ad quod præstandum, scire debent Tirones, non solum principia internorum impulsuum tam sanctorum, quàm suspectorum, sed etiam indicia, ex quibus suggestiones bonæ à malis dignosci possint.

103. Et primò quidem de suspectis agendo inspirationibus, sciendum est, tria esse principia earum, quæ ad noxia & illicita, sive directè, sive indirectè sub specie boni inducunt. *Primum* principium est Sathan, hac in materia vaferrimus impostor, transfigurans se in Angelum lucis, ut scribit Apostolus; unde profectas ab eo motiones, & dictamina vocat scriptura sacra: immisiones per Angelos malos. *Secundum* principium, ut S. Thomas notat, est nostra corrupta, & depravata voluntas, amorque proprius, semper in sui-met commodum intentus, qui seducit plurimos, & corrumpit, ut putet se agi Zelô alicujus virtutis, quando in veritate aliud non subest, quàm passio. *Tertium* prin-



cipium est ratio, & iudicium nostrum, tot erroribus noxiis, & concupiscentiis offuscatur, præsertim in spiritualibus, & moralibus.

104. Ex his principiis ortæ suggestiones deprehendi solent ordinariè, ex indi-  
ciis sequentibus. *Primò* si tempore non suo, & impertinenti occurrant, cum quo ejusmodi inspirationes se non bene compatiuntur, nec ullam habent connexionem. *Secundò*. Si veniant cum inquietudine, tumultu, confusione, & perturbatione animi. *Tertid*. Si alicui legi, aut regulæ, si alicui dispositioni obedientiæ, vel disciplinæ domesticæ repugnant. *Quartò*. Dignoscuntur ex fine, ad quem tendunt, si nimirum vergant in proprium nonnisi commodum, & temporale lucrum. *Quintò*. Si actiones talium motionum sint cum aliqua offensione communitatis conjunctæ; vel sapiant exoticam singularitatem, aut communibus studiis, ac moribus alicujus domûs religiosæ, & disciplinatæ non sint consentaneæ. Tunc enim verò illi impulsus & stimuli interni, etiam sub specie boni, ad opus aliquod inducentes, rationabiliter suspecti nobis esse debent de inordinatione, & pravitate aliqua; atque ità non statim admittendæ, sed priùs trutinandæ, & cum suo in Spiritu Magistro conferendæ.

105. Tria quoque sunt principia sanctarum ex opposito inspirationum internarum. *Primum* est : Author omnium bonorum DEus optimus, & unctio Spiritus Sancti; qui internè sæpius illuminat, docet, excitat, monet, invitat, animat, impellit, & inflammat ad ea, quæ sunt nostræ salutis, ac profectus spiritualis, idque etiam per seipsum. *Alterum* earum principium sunt Angeli boni in ministerium salutis missi, ut scriptura loquitur, hi etiam pulsant sæpe animum nostrum salutaribus monitis; cavent, & terrent à malis; impellunt ad quævis bona. *Tertium* principium est naturalis constitutio, & sana corporis complexio, valdeque ingenua, propitia, ac timorata indoles. Sunt, qui cum Salomone fortiti animam bonam, ad honesta quæque, ac virtuosa inclinant; præsertim tenerior quædam, & facilè tractabilis conscientia mentem salutare timore Dei configens, & mali horrorem ingerens.

106. Sanctarum inspirationum internarum ex his principiis ortarum hæc solent esse indicia. 1. Opera huiusmodi bonarum motionum inducunt in animum hominis absque ulla admixtione mali sensum odii de peccato, sensum amoris erga virtutes, desiderium salutis propriæ, & alienæ. 2.

In-

Inspirationes bonæ semper fundantur in rectitudine intentionis Sanctæ, & sine secundum se bono, ac directo ad Dei gloriam, ad mortificandas passiones, ad charitatis religiosæ officia, ad contemptum sui, ad regularem Instituti, & legum observantiam. 3. Inspirationes boni Angeli proportionatæ sunt ad complexionem, & indolem seu ingenium hominis; ad naturæ vires, officium, Vocationem, ætatem, capacitatem; ut scilicet sint conducentes, & convenientes singulis circumstantiis bonarum actionum. 4. Discernenda sunt bona dictamina, & impulsus boni à malis ex eo, quod illa semper inmittantur homini cum discretione, & ita evitentur extrema, omnisque confusio interior amoveatur, atque universa ordinatè, ac suis in circumstantiis fiant. 5. Denique si suggestiones ejusmodi sint conformes oraculis divinis, Sanctorum Patrum doctrinæ, fini, & ministeriis religiosæ vocationis, pro suspectis habendæ non erunt.

107. Quantum profit, imò sæpius necesse sit divinis hujusmodi inspirationibus obtemperare, & secundum illas fideliter agere, luculenter patet, ex fine vocationis nostræ religiosæ, qui est, ut tendamus, & enitamur assiduo conatu ad perfectionem Spiritûs, & virtutis, ex quo sic discurre:

omnis

omnis amans, & cupidus salutis suæ, quales sunt singuli æmulatores JESU in sancta ejus Societate, debet uti mediis non modo necessariis ad salutem, sed etiam juvenilibus, & promoventibus ad profectum spiritus & virtutis; sed inter ejusmodi media juvenantia, & promoventia, sunt etiam sanctæ inspirationes internæ, ergo salutis amans, & verè cupidus virtutis, ac perfectionis spiritualis debet uti dictis impulsibus Divinis. Ad quod ulteriùs nos movere debet uberrimus talium inspirationum fructus, nam ut tradit magnus Gregorius lib. 2. Moral. Cap. 2. si illis bene utamur, & cooperemur, aspera, & difficilia mitigant, animos frigidos, & tepidos accendunt, infirmos roborant, dubios firmant, distractos colligunt, induratos in malo ad pœnitentiam emolliunt, quod sæpe nullis consiliis, monitis, & flagellis humanis evinci potest: unde & plurimis tales inspirationes Divinæ, quibus obsecuti sunt, certa & unica via fuerunt ad vitam æternam, aliàs æternum perituri, si ejusmodi motionibus sanctis non paruiſſent.

108. Quemadmodum porrò in exequendis inspirationibus divinis magnum interest bonum; ita è converso illis neglectis ingens subest malum, & grande emergit exinde damnum; nam si DEO excitanti,  
&

& stimulantī ad opera pia, atque sancto  
 non obsequamur, valde metuendum est,  
 nē in vacuum missis talibus DEI gratiis  
 singularibus, justam ejus iram in nos pro-  
 vocemus, ut in gravibus defectibus, &  
 peccatis nostris obduremur, & aliis etiam  
 auxiliis divinis extraordinariis destitua-  
 mur, quarum factā jacturā graviter pe-  
 riclitemur de amittendā gratia finali;  
 hæc enim ex mente plurium Sanctorum  
 Patrum, & Doctorum habet sæpius itā  
 Deo ordinante mirabilem, inscrutabilē-  
 que connexionem cum ejusmodi impul-  
 sibus divinis ad specialia quædam virtu-  
 tum opera suggestis, quibus neglectis,  
 DEUS etiam homini subtrahat illam gra-  
 tiam, sinē qua finaliter non perseveret.  
 Cujus ratio ex Sanctis Patribus hæc adfer-  
 tur, quod scilicet neglectus talium mo-  
 tionum internarum à Deo immissarum sit  
 magna dehonoriatio, ac contemptus Di-  
 vine Bonitatis, ac misericordiæ, quo  
 contemptu Dei, ejusque gratiarum ne-  
 glectu interruptitur solum, & series præ-  
 destinationis, atque succedit obstinatio  
 in malo, ac impœnitentia demum finalis.  
 Ex quibus omnibus patet, quā prom-  
 ptè, ac fideliter ambæ aures Deo nobis  
 internè loquenti accommodandæ sint, una  
 quidem aures intelligentiæ, quâ in sibilo  
 auræ



800 PLN  
Bibliotheca  
ensium in Bielany

Bibliotece Jagiellońskiej



06072

G.1.29



& stimulant ad opera pietatis  
 non obsequamur, valde ne-  
 cè in vacuum missis talibus  
 singularibus, justam ejus in-  
 vocemus, ut in gravibus  
 peccatis nostris obduremu-  
 auxiliis divinis extraordi-  
 mur, quarum factâ jacturâ  
 riclitemur de amittenda  
 hæc enim ex mente plurimi  
 Patrum, & Doctorum ha-  
 Deo ordinante mirabilem,  
 que connexionem cum ejus  
 sibus divinis ad specialia quæ  
 tum opera suggestis, quia  
 DEUS etiam homini subtra-  
 tiam, sinè qua finaliter ne-  
 Cujus ratio ex Sanctis Patri-  
 tur, quòd scilicet neglectu  
 tionum internarum à Deo in-  
 magna dehonoriatio, ac con-  
 vitiæ Bonitatis, ac misericordie  
 contemptu Dei, ejusque gra-  
 glectu interumpitur alium,  
 destinationis, atque succed-  
 in malo, ac impœnitentia de-  
 Ex quibus omnibus patet,  
 prout, ac fideliter ambæ aures Deo nobis  
 internè loquenti accommodandæ sint, una  
 quidem auris intelligentiæ, quâ in sibilo  
 auræ

*X. Nov...*

535

535

1814



66305

**Bibliotheca**

800 PLN

**P. Camaldulensium in Bielany**

Depozyt w Bibliotece Jagiellońskiej



06072

G.1.29

1200

1200

